

سرى للغاية

محضر اجتماع مجلس الوزراء برئاسة الرئيس جمال عبد الناصر

القاهرة - قصر القبة فى ٢٤ نوفمبر ١٩٦٨

الحاضرون

إبراهيم زكى قناوى.. للرى، على زين العابدين صالح.. للنقل، أحمد مصطفى أحمد.. للبحث العلمى، السيد جاب الله السيد.. للتخطيط، حسن حسن مصطفى.. للإسكان والمرافق، محمد بكر أحمد.. لاستصلاح الأراضى، عبد العزيز محمد حجازى.. للخزانه، محمد حافظ غانم.. للسياحة، محمد صفى الدين أبو العز.. للشباب، عبد العزيز كامل.. للأوقاف وشئون الأزهر، محمد حمدى عاشور.. للإدارة المحلية، عبد الوهاب البرلسى.. للتعليم العالى، حافظ بدوى.. للشئون الاجتماعيه، محمد عبد الوهاب شكرى.. للصحة.

الرئيس جمال عبد الناصر، صدقى سليمان.. نائب الرئيس ووزير الكهرباء والسد العالى، كمال رفعت.. للعمل، عزيز صدقى.. للصناعة والبتترول والثروة المعدنية، ثروت عكاشة.. للثقافة، محمد أبو نصير.. للعدل، سيد مرعى.. للزراعة والإصلاح الزراعى، حسن عباس زكى.. للاقتصاد والتجارة الخارجية، عبد الوهاب البشرى.. للانتاج الحربى، محمود رياض.. للخارجيه، شعراوى جمعة.. للداخلية، أمين هويدى.. للدولة، محمد فائق.. للإرشاد القومى، كمال هنرى أبادير.. للمواصلات، فريق أول محمد فوزى.. للحربية، محمد حلمى مراد.. للتربية والتعليم، محمد عبد الله مرزبان.. للتموين والتجارة الداخلية،

المحتويات

الصفحة

الموضوع

- ١ حلمى مراد.. بدء الاضطرابات بالمنصورة بإضراب فى مدرستين خاصتين
- ٢ عبد العزيز كامل.. الأحداث فى المعاهد الأزهرية فى المنصورة حتى ٢٣/١١/٦٨
- ٣ تقرير شعراوى جمعة عن الأحداث فى المنصورة
- ٤ محمد أبو نصير.. نتائج التحقيق فى أحداث المنصورة
- ٥ عبد الوهاب البرلسى.. كيف بدأت وتطورت أحداث الجامعات يوم ١١/٢٣
- ٦ مناقشة قرار إيقاف الدراسة فى الجامعات والمعاهد العليا وتداعياته

سرى للغاية

قرارات مجلس الوزراء

فى ١٩٦٨/١١/٢٤

الطلبة والجامعات موضوع البحث الرئيسى فى مجلس الوزراء.
طرح الأسباب التى اتخذ على أساسها القرار الخاص بتعطيل الدراسة فى الجامعات، وكانت
التوصية بذلك القرار قد اتخذت بواسطة لجنة خاصة تابعت التطورات التى وقعت فى جامعة
الإسكندرية، وكانت تضم الدكتور لبيب شقير وعبد المحسن أبو النور وشعراوى جمعة وعبد الوهاب
البرلىسى.

سرى للغاية

محضر اجتماع مجلس الوزراء برئاسة الرئيس جمال عبد الناصر

القاهرة - قصر القبة فى ٢٤ نوفمبر ١٩٦٨

عبد الناصر: بالنسبة لموضوع الطلبة، إمبراح بالليل الساعة ١ كان تقريبا فيه إجماع من كل المسؤولين بطلب قفل الجامعات.. فبنسمع الحقيقة من السيد وزير التربية والتعليم والسيد وزير الداخلية والسيد وزير الأوقاف والسيد وزير التعليم العالى عن المواضيع كلها، وبنأخذ صورة عن اللى حصل فى الـ ٣ أيام اللى فاتت.

مراد: فى الواقع مشروعات قوانين التعليم قد أعدت منذ ستة أشهر، وبدأ النشر عنها فى الصحف، وهى مشروعات ومبادئ على نطاق واسع وتكرر عنها النشر فى جميع الصحف اليومية، وكلفت لجان مثلت فيها جميع الجهات المعنية سواء كانت الجامعات أو المعاهد أو الاتحاد الاشتراكى أو اتحادات الطلابية، وكان أول مرة بيحضر طلبة فى لجان فيها وزراء ووكلاء وزارات حضروا اللجنة الخاصة بقوانين التعليم، ثم نوقش أيضا هذا القانون فى الاتحاد الاشتراكى ونوقش فى اللجان الوزارية، وكان بيصادف صدى تأييد فى جميع الأوساط من أولياء الأمور ومن المدرسين ومن الطلبة ومن جميع الجهات، وأخيرا تم إعتقاد قانون التعليم العام ونشر عنه.

وبعدھا بيوم عقدنا مؤتمر لمديرى التعليم فى المحافظات المختلفة، لوضع القرارات التنفيذية والأحكام الانتقالية تطبيقا للمادة ٦٩ من القانون. وإحنا منعدين - وكان الانعقاد فى المنيا - فوجئنا بأن فيه إتصال من القاهرة ومن المنصورة - وكان ذلك فى يوم الأربعاء - بأنه فيه إضراب فى مدرستين خاصتين بالمنصورة وإنهم تأثرين على النصوص الجديدة فى قانون التعليم! فسألنا إيه محل الشكوى؟ قالوا: محل الشكوى إنه الطلبة اللى كانوا تركوا بعض المواد وصلوا لغاية السنة النهائية، كيف هيحصلوا المواد الجديدة فى المدة القليلة الباقية؟

والنقطة الثانية: عدد مرات الرسوب، فقلنا لهم: إحنا بالصدفة مجتمعين دلوقتى ووضعنا أحكام انتقالية فى هاتين النقطتين..

النقطة الأولى: إنه الشهادات العامة الإعدادية والثانوية العامة، نظرا لأن ضيق الوقت ولأنهم مالهمش دور تانى هيتمحنوا على النظام القديم وهيستفيدوا أيضا من الحذف والترك فى المناهج. وإنه بالنسبة لسنوات النقل سنة أولى إعدادى داخلية على النظام الجديد، بداية سنة ثانية إعدادى هتأخذ المواد اللى يكون طالب تركها فى فصول تقوية على

سرى للغاية

حساب الدولة، وهمعلمهم فيها امتحان على مستوى الاستيعاب اللى خدوه، واللى يرسب فيها هياخد دور تانى وكذلك فى أولى وتانية ثانوى.

فمرات الرسوب قلنا: إن ٣ مرات رسوب مش هتسرى على الماضى، وتبدأ من هذا العام وبعد ٣ سنوات اللى يرسب فى مادتين له إنه يدخل أيضا فرصة أخرى. فهل هناك واحد دلوقتى عايز يعربن من دلوقتى إنه هيسقط ثلاث سنين مقدما ثم بعد ٣ سنين هيسقط فى أكثر من مادتين وزعلان مقدما قبل أربع سنوات!؟

فلما وصلت هذه المعلومات، فالسيد المحافظ فى الدقهلية قال: لا.. دى تعتبر كافية أوى، فراح اجتمع بالطلبة وكلمهم وأعتبر الموضوع منتهى.

ويوم الخميس فى اليوم التالى، كانت الدراسة منتظمة فى جميع المدارس الثانوية العامة فى المنصورة وفى غير المنصورة، بدأت بقى ظاهرة جديدة المعهد الدينى فى المنصورة - الصورة اللى أنا سمعتها - إنه جم لاقوا الباب مغلق فمدخلوش وكان التجمع قصد المعهد، فكانت فرصة للعناصر اللى عايزة تثير شغب فقعدوا يتكلموا فى مسائل خاصة بالمواد الثقافية أو المواد الحديثة فى الأزهر والمواد الدينية وإن مجموع الاتنين ثقيل عليهم، وانكلموا فى مسائل أخرى سياسية.

طبعا قانون التعليم مابيسريش عليهم لأن هم لهم قانون خاص بيهم هو قانون الأزهر، ولو إنه صدر منذ عدة سنوات إلا إن اللائحة التنفيذية اللى بتصدر له ماصدرتش حتى الآن. فكانوا بيلجأوا فى امتحان المواد الحديثة لوزارة التربية والتعليم لوضع الامتحانات وتصحيح امتحاناتهم، إنما مفيش ما يقيدهم أبدا لا فى نظامنا ولا بقواعد امتحاناتنا، إنما للأزهر السلطة الكاملة بأنه يضع لهم أى قواعد يشاءوا ولم يطلبوا هم مننا أى قواعد فى هذا الشأن.

وبعدين المظاهرة يظهر بدأت من المعهد الدينى، دا حسب ما سمعت بعد ماروحت زورت المنصورة، وسارت من المعهد الدينى خارج البلد من إحدى النواحي وحى المدارس أو تكتل المدارس الثانوية والإعدادية فى الناحية الأخرى من المنصورة. الشرطة رأت إنها تسبب الموضوع سلمى ولا تتعرض لهم بل تحرسهم. وسارت المظاهرة سلمية فى الأول، ويظهر بعد ما مشيت وصلت لغاية المدارس فى نهاية البلد بدأوا يحاولوا يخرجوا طلبة المدارس الإعدادية والثانوية، فرفضوا يخرجوا فضربوا المدارس بالطوب حتى مدارس البنات علشان يخرجوهم بالقوة!

سرى للغاية

لما حصل ضرب بالطوب، اندست عناصر أخرى وحصلت تجمعات طلبية من إعدادى وثانوى مع طلبية المعاهد الدينية، والبعض راح الى مديرية الأمن عايز يقتحمها ويستولى على السلاح اللى فيها، فالكراكون اللى بيحرس السلاح فى مديرية الأمن رأى دفاعا عن مديرية الأمن والسلاح إنه يطلق أعيرة نارية فأطلق أعيرة نارية فى الهواء ثم نحو الأرجل.

حصل زى ماجاء فى بيان وزارة الداخلية، فيه أربع حالات وفاة وفيه بعض إصابات كان أغلبها من ضباط ورجال الشرطة!

السيد الرئيس أمر ببنى أروح المنصورة، ذهبت للمنصورة يوم الجمعة صباحا وهناك اجتمعت بنظار المدارس ومديرى التعليم والمفتشين، واتكلمنا معاهم فى الأوضاع اللى كانت موجودة وأى استفسار عن القوانين. وقالوا لى: إنه بعد ما التفسير جيه للطلبة قالوا: إن ده أكثر مما يطلبون! يعنى هم كانوا طالبين يمتحنوا حسب النظام القديم فى الثانوية العامة فهم امتحنوا حسب النظام القديم زائد الاستفاداة من التخفيف فى المناهج، وإن مرات الرسوب فى سنوات النقل هى كالتقديم مرة فى كل صف ومرتين فى المرحلة. فجد فى القانون الجديد إنه إذا الطالب فصل له أن يمتحن من الخارج فى أى سنة من سنوات النقل بدون تحديد لعدد المرات التقدم. كل التجديد فى امتحان الثانوية العامة إنه ثلاث مرات وبعد الثلاث سنوات حتى الاعتذارات لا تحسب، ثلاث مرات يؤدى الامتحان أداء فعليا ويرسب وبعدها إذا سقط فى مادتين أيضا له إن يمتحن، فقالوا لى: إن بعد هذا مفيش أى اعتراض.

بعد هذا اجتمعت بالطلاب، وكان فيه هناك مجلس اتحاد طلاب الجمهورية وقابلتهم وقعدت مع الطلاب هناك فى المنصورة وطلاب اتحاد الجمهورية، وتفاهموا فى كل حاجة ووجدت إنهم راضيين عن كل حاجة. روحت زورت اللى فى المستشفى ووجدتهم إنهم خمسة بالعدد طلبية وإصاباتهم كلهم بسيطة مطمئنة.. كلها فى الأرجل ماعدا واحد فى جرح سطحى فى جدار البطن، واطمئنت عليهم ولاقيت حالتهم المعنوية مرتفعة وقابلت أهاليهم واتفقت ننقلهم فى غرفة خاصة ويريحوهم فى المستشفى.

ثم بعد ذلك عدنا الى القاهرة بعد ما اتفقنا على إن المدارس اللى اتكسر إزازها بالمنصورة ماتفتش لحد ما يتم الإصلاح، وتبقى فيه فرصة لتهدئة النفوس بعد حصول بعض الوفيات، وتفتح تدريجيا كل مدرسة اتصلح إزازها تستقبل الطلبة ولا يعلن عن هذا فى الصحف وإنما يعلن داخل المدينة، وأيضا يبلغ عمد القرى المجاورة لبندر المنصورة علشان يرجعوا على الطلبة علشان ميروحوش تانى يوم ويحصل تجمعات.

سرى للغاية

بعد هذا حصل إنه يوم السبت اللى هو أمس المدارس كلها الثانوية، طبعا إحنا عملنا إستعداد فى كل أنحاء الجمهورية، وإن كل فصل له رائد يشرف عليه ونظار المدارس بيقوا موجودين وفيه توعية عن أى سؤال فى القانون؛ محصلش أى استفسارات ولا أى تجمعات وانتظمت الدراسة فى جميع أنحاء الجمهورية.

أبلغت أمس عن اللى حصل فى الجامعة، إنه فى هندسة إسكندرية حصل يظهر نتيجة نقل بعض معلومات عن المنصورة، حصل فيها اضطراب. يمكن السيد الزميل وزير التعليم العالى يشرح الجزء الخاص بالجامعات، إنما إحنا رغم هذا النهارده برضه كل الثانوى وكل الإعدادى انتظم، ماعدا بعض مدارس فى الشاطبي أربعة اللى هى فى الحى اللى موجود فيه كلية الهندسة جامعة إسكندرية لأنهم مجاورين للمكان، حصل إنه مدخلوش الطلبة بالكامل دخل عدد قليل منهم وبعد شوية خرجوا.

بقية المدارس إنها المعلومات اللى عندنا كلها منتظمة، طبعا مش معنى هذا إن احنا يعنى مطمئنين كل الاطمئنان باكر. إحنا نيهنا بأن برضه تستمر حالة اليقظة والاحتياط باكر لأنه جازز إنه طلبة الجامعة يحاولوا يثيروا طلبة ثانوى، وقلنا: احتاطوا للتسلل حد يدخل جوا المدارس.

النقطة الثانية: إنه يصح بعض الطلبة اللى يحبوا يرتاحوا أو ياخدوا اجازة يحاولوا يقلدوا الجامعة فى إنهم يدعوا الى الإضراب علشان تتعطل الدراسة؛ فنبهنا إن الإستعداد ببقى مستمر يوميا لحد ما تهدأ الحالة تماما.

فى اعتقادى أنا إن المسألة مش طبيعية، يعنى بتبدأ فى مدرستين خاصتين ثم بعد ما تهدأ فى نفس المنطقة ترجع معهد دينى، وبعدين يعنى نتيجة الإشتباك اللى مع البوليس يستغل بعد هذا الوضع اللى حصل وكان فى المنصورة فقط ولم يحصل غير هنا! يمكن فى أول يوم فى مدرسة بنباقادن، حصل إن بعض طلبة حاولوا إنهم يعملوا برضه شوشرة فخدوهم واجتمعوا فى الخديوية وشرحوا لهم المسائل، وبعثوا سؤالين استفسروا عنهم وردينا عليهم فانتظمو وبعثوا تلغراف شكر. وأنا جالى تلغرافات النهارده من اتحادات طلابية فى الأقاليم بيستتكروا اللى حصل وإنهم مش موافقين على اللى حدث. وأى إستفسار أنا مستعد أجاب عليه.

عبد الناصر: الأخ عبد العزيز.

كامل: لو أذنت لى أقسم الحديث قسمين.. قسم يتعلق بالإجراءات التى اتخذت من القاهرة، وقسم يتعلق بالأحداث التى حدثت فى المنصورة.

سرى للغاية

فيما يتعلق بالجزء اللى حدث فى المنصورة: المرجع فيه هى التقارير الرسمية الموقعة من المراقب العام للتعليم الثانوى بالأزهر ومفتشى المعاهد الذين كانوا موجودين فى المنطقة للتفتيش الدورى. وهذه التقارير موقعين عليها وبعث صورة منها لسيادتكم النهارده وصورة للداخلية أيضا.

وملخص هذه التقارير: إنه يوم الأربعاء كان موجود مراقب عام التعليم الثانوى للأزهر فى المنصورة فى دورة تفتيشية عادية، وكانت الدراسة منتظمة يوم الأربعاء. كان وصوله فى المعهد الساعة ٩ صباحا، وبعدين بيقول: إنه فى أثناء مروره الساعة ١٠,٣٠ تقريبا فوجئ بجلبة موجودة خارج المعهد. فترك السيد الوكيل يبحث الأمر حتى لا يتطور الأنظار اليه ولجأ الطلبة اليه وصار يتابع المناقشة مع الطلبة. وبعد ذلك سئل عما حدث فى التطوير فى وزارة التربية والتعليم، فأكد لهم أننا على وضعنا وأن ذلك الأثر لا يمكن أن يسرى على الأزهر لأننا نختص بنظمتنا فنحن على نظام الامتحان المعمول به عندنا. وانتهاز هذه الفرصة ووجه لهم النصح بالإخلاق الى السكينة حتى لا يتعرض المعهد أو المعاهد الأخرى بما لا يصح أن ينسب ليها.

ويعد ذلك يقول: خرجت من الحجرات فرأيت بنفسى أفرادا قيل إنهم من طلبة المدارس، وفيهم من يرتدى الجلابيب فى صور لا تدل على أنهم طلاب حتى! وقد حاول هؤلاء أن يزجوا طلبة المعهد، وصاروا يرحمون ما يصلون اليه من الأماكن بالحجارة حتى هشموا الكثير من زجاجه. ولكن طلابنا نبهوا أن تلك أمور لا تعنيهم ولا يليق بهم المشاركة فيها واستمروا فى دروسهم. وكان للمعهد نشاط واضح فى شغل الطلاب بدروسهم وصرفهم عن التأثير بتلك الجلبة، وقد لمست فى السيد وكيل المعهد الأستاذ فخر الدين نشاطا ملموسا فى مروره على الحجرات وفى تتبعه لسير الدراسة، وشكرت له هذا المجهود على حفظ النظام. وحضر الى المعهد سيادة السيد المحافظ واطمئن الى الوضع وشكر للمعهد هدوئه، ثم تفضل فوعد بإصلاح ماتهمش من زجاج أو غيره. وكان مع سيادته بعض رجال الشرطة والأمن وكانت المخابرات بقاتتهم مشكورة، واستمر الوضع الى إنتهاء الحصص اليومية بهذا المعهد فى ذلك اليوم. ثم غادرت المنصورة الى المحلة استكمالا لنشاطى بعد تمام الاطمئنان على أمر معهد المنصورة ونظامه، ثم بعد هذا اسأل الله التوفيق.

١١/٢٣ تاريخ كتابة التقرير.

الإمضاء محمود أمين النواوى.. المراقب العام للتعليم الثانوى بالأزهر.

هذه هى الوثيقة الأولى المذكرة منها أو صورة منها لسيادتكم وصورة للداخلية.

تقرير آخر من السيد عبد الحكيم عنانى المفتش بالمعاهد الأزهرية ومعاها النصوص بتاعتهم. العنانى كان موجود فى الأربعاء وكان موجود فى الخميس فى المنصورة أيضا

سرى للغاية

على أساس المنصورة موجود فيها معهد القرىعى وفيها المعهد الثانوى والإعدادى فى نفس الوقت، فتفقد معهد القرىعى يوم الأربع وجد الدراسة فيه منتظمة. وفى وقت الظهر سمعت إن طلبة المدارس طافوا ببعض شوارع المدينة معلنين احتجاجهم على قوانين الامتحانات الأخيرة. وبسؤالى عن طلبة معهد المنصورة، علمت إنه لم يحدث منهم ما يخل بالنظام الدراسى فهو كان فى القرىعى والأستاذ النواوى كان موجود فى معهد المنصورة.

صباح الخميس توجهت الى معهد المنصورة الثانوى والإعدادى للاطمئنان على سير الدراسة فيهما، فلم أجد طلابا فيهما لأن تلاميذ المدارس وقفوا فى طريقهم الى المعهد وصرفهم عن الدراسة، فانصرفوا الى قراهم ملتسمين فى ذلك حلول شهر رمضان المبارك وانتهاء الأسبوع وقرب قراهم من المعهد، وقد تعودوا على ذلك، فى نهاية كل أسبوع يعنى يوم الخميس متعودين إن هم مش عبارة عليهم من أيام الانتظام بتاع الدراسة وخصوصا إنه موجود فى أول رمضان.

وقد علمت أنه فى الأمس الأربعاء، تجمع طلاب المدارس محاولين إثارة شعور طلاب المعهد وإخراجهم من الدراسة، ولكن طلاب المعهد لم يستجيبوا لهم فاعتدوا عليهم بقذف نوافذ المعهد بأحجار. وقد زار السيد المحافظ المعهد وشكر الأساتذة نفس الكلام والمعنى اللى بنجده فى تقرير النواوى.

ومما تقدم تبين عدم حصول حوادث من طلاب معهدى المنصورة القرىعى والمعهد الثانوى والإعدادى ويشهد لهذا ما سمعته من أفواه الناس، وأن حوادث اليوم لم يشترك فيها طلاب المعهد بل كانت بعيدة عنهم؛ لأن الطلاب قد انصرفوا الى قراهم فى الصباح.. أدام الله عليهم ووفقنا.

والتوقيع.

دا فيما يتعلق بالتقرير .

يأتى بعد هذا تقرير تالت مبنى من إدارة المعاهد الدينية نفسها، وده مرفوع من الدكتور ماضى عن هذا الموضوع نفسه. فيما يتعلق بالأربع بيتفق مع التقارير الماضية كلها. فيما يتعلق بيوم الخميس، الملاحظ إن مواعيد شهر رمضان ٨,٣٠ فالمعهد فتح فى ميعاده فلم يدخل المعهد إلا قلة ضئيلة لا تتجاوز الـ ٥٠ عددا، ولم يكن فى هذا الموعد ٨,٣٠ ولا بعده طلاب على الإطلاق يحيطون بالمعهد أو يتجمعون بالقرب منه. وعلمنا من السيد ضابط المباحث الملازم المعهد إن عدد من التلاميذ والطلاب تجمعوا خارج المعهد وبعيدا عنه حوالى الساعة الثامنة صباحا أى قبل بدء الدراسة بساعة، ثم توجهوا الى مدرسة الملك الكامل الثانوية وتتابعات الحوادث المؤسفة.

سرى للغاية

قبيل العاشرة صباحا، حضر السيد المحافظ ووقف بباب المعهد وقابله فضيلة وكيل المعهد الشيخ فخر الدين، وأخبره أن المعهد فتح أبوابه فى المواعيد المقررة لشهر رمضان أى ٨,٣٠ ولم يدخل الى المعهد إلا عدد قليل. فطلب السيد المحافظ حصرهم، كما أخبره بأن أحد من طلاب المعهد غير العدد الذى تم حصره لم يدخل المعهد ولم يقترب منه، وبالتالي لم تخرج من المعهد أى تجمعات طلابية.

حوالى الساعة ١٢ ظهرا، اتصلت شرطة النجدة بفضيلة شيخ المعهد الثانوى وطلبت منه ايفاد وكيل المعهد لمقابلة السيد المحافظ بالقرب من مدرسة ابن لقمان. وتوجه الشيخ فخر الدين ومعه الشيخ عبد العزيز بسيونى المدرس الأول بالمعهد الاعدادى وقابلا السيد المحافظ فى المحافظة اللى كان قد عاد اليها. وأثناء الاجتماع جاء نبأ تجمع عدة آلاف أمام مديرية الأمن، فطلب السيد المحافظ من مندوبى المعهدين إصطحابه الى مكان التجمع حيث احتشدت عدة آلاف من الطلاب هناك. وقد أخبرنا فضيلة الشيخ وكيل المعهد بأنه أعلن أمام السيد المحافظ أنه لا يوجد بين هذه الجموع الكثيرة أى طالب من طلاب المعهد الدينى وكررها فى كثير من المواقف، كما أخبرنا أنه بذل جهدا كبيرا فى معاونة السيد المحافظ على تهدئة الحالة ونصح المتظاهرين.

الساعة عشرة مساء، استدعى فضيلة وكيل المعهد الشيخ فخر الدين الى المحافظة حيث سأله السيد النائب العام عما حدث، وكانت أقواله فى الحدود التى سبق بيانها. بعد ذلك عملية تلخيص لهذا كله:

١- إن الدراسة فى المعهد استمرت طول يوم الأربعاء، على الرغم من مهاجمة تلاميذ المدارس المعهد وإحداث تلفيات به.

٢- حضر الى المعهدين صباح الخميس حوالى ٥٠ طالبا فى موعد الدراسة، ولم يحضر باقى طلبة المعهد.

٣- لم تخرج من المعهدين أية مظاهرة ولم يتجمع حوله أو أمامه أى طلاب.

٤- بدأت المظاهرات حوالى ثمانية صباحا بينما الدراسة تبدأ فى المعهد تسعة، أى إن المظاهرات بدأت قبل بدء الدراسة بساعة كاملة، وهذا ينفى اشتراك طلاب المعهد فيها أو على الأقل ينفى أن يكون طلاب المعهد هم سبب هذه المظاهرات.

سرى للغاية

فى الساعات الحرجة لهذه الحوادث المؤسفة، كان قد تجمعت عدة آلاف إندس بينهم عدد كبير من غير الطلاب، وليس من المستطاع إطلاقاً أن يتبين الإنسان عن طريق اليقين هل كان بينهم عدد من طلاب المعهد الدينى، وإن كان هذا لا ينفى أنه كان هناك بالضرورة عدد من طلاب المعهد الدينى، وإن كنا نرجح أنه عدد قليل.

ويدعم ذلك أن طلاب المعاهد الدينية قد تعودوا قضاء اليوم الأول من رمضان بين ذوبهم احتفالاً منهم بهذا الشهر المبارك، وساعد على ذلك أن اليوم الأول من شهر رمضان هذا العام صادف يوم الخميس فانصرف معظم الطلاب الى قراهم. ونود أن نؤكد أن إلقاء تبعة ما حدث على طلاب المعهد الأزهرى ينفية تطور الأمور وتسلسل الحوادث كما رويها، وقد قامت إدارة المعهد بأداء واجبها كاملاً، كما اشترك السيد وكيل المعهد مع السيد المحافظ فى جميع المحاولات التى بذلت لتهدئة الأحوال، وفضل فضيلة الشيخ ووكيله فى المعهد طوال يوم الخميس وطوال يوم الجمعة.

توقيع.. الحكيم عنانى المفتش عمر طلعت زهران، بالإضافة الى تقرير المراقب العام الشيخ محمود أمين النواوى.

أنا قصدت فيما يتعلق بالمنصورة إنى ألبأ الى التقارير المكتوبة والموقعة منهم. هنيجى للجانب الآخر وهو متعلق بالقاهرة، الخبر تفضل السيد وزير الداخلية كلمنى فيه فى حدود الساعة ١١ صباحاً، اتصلت على طول بالمعاهد فاتصلوا بالمنصورة وقالوا: الصورة لا تخرج كثيراً عما جه بعد ذلك بالتقارير اللى تكرمت سيادتكم بالاستماع اليها.

كان قدام منى طريقتين: يالما إنى أذهب الى مكان الحادث بالمنصورة يالما أعمل على عملية تأمين المعاهد الأخرى. وياتصالى ببعض الإخوة المسؤولين فى مكتب سيادتكم وفى الداخلية، كان الأفضل إن احنا نعمل عملية تأمين للمعاهد الأخرى على أساس إن هناك من الإخوة من يستطيع أن يقوم بمتابعة الأمر على الطبيعة فى المنصورة.

فى الساعة العاشرة صباح يوم الجمعة، عقدت اجتماع فى الوزارة حضره المسؤولين عن المعاهد.. وكيل الوزارة لشئون المعاهد ومدير عام المعاهد وكل الإخوة الموجودين فيه ومدير مكتب الأمن. واتفقنا على إن احنا نقسم العمل قسمين.. القسم الأول: يتعلق بالناحية التنظيمية، وهى وجوب تربية الطلاب كلهم على أساس إنهم ما يخرجوش من إيد ادارة المعاهد وبالتالي من إيد الأزهر كله؛ عن طريق تدعيم الصلة، ووجود خط قيادة منتظم واضح وصريح ما بين الوزارة من ناحية وما بين مشايخ المعاهد من ناحية ثانية، ثم ما بين الشيخ وما بين هيئة التدريس من ناحية ثانية، ثم بعد هذا من ناحية ثالثة تقسيم الطلاب بحسب الفصول على هيئة التدريس بحيث إنهم يكون لهم رواد يجمعون بين الجانب

سرى للغاية

العلمى والجانب الدينى. وانتهزنا هذه الفرصة فى الواقع، على أساس إن يكون هذا هو التحرك السياسى الواجب فى هذه المرحلة فى المعاهد.

الناحية الثانية: هى إن هذه القوانين من الناحية الموضوعية البحتة لا تمس الأزهر، وإن الأزهر لن يضار ولن يغير أى شئ من قوانينه إذا ما غيرت وزارة التربية والتعليم أى حاجة. وهذا المعنى هو الذى خلانى مارضيتش أتعرض لهذه القوانين حينما ناقشها أذى الدكتور حلمى مراد؛ على أساس فى الواقع إن هذه المشكلة مشكلة قديمة بترجع على الأقل لسنة ١٩٦١ واستمرت سبع سنوات فى الأزهر، ولا يمكن إنها تحل فى يوم وليلة. وإذا كان أذى الدكتور حلمى مراد أخذ على الأقل ثمانية شهور دراسة علشان يطور البرامج عنده، فبعثتق إن الأزهر وهو يجمع بين الجانبين له مشكلة أكثر تعقيدا من المشكلة الموجودة فى مدارس التربية والتعليم.

قلنا لهم حاجتين..

الحاجة الأولى: إنكم مالكوش دعوة بهذه الموضوعات ودى لا تمسكم فى قليل ولا

كثير.

الناحية الثانية: إن الموقف لا يتحمل هذا التحرك، وينبغى أن تعلموا إن بعد التقدم الذى إحنا عملناه وبعد التطور السياسى الذى إحنا عملناه والتطور العسكرى الذى إحنا عملناه، لابد أعداءنا هيحاولوا إنهم يحركوا أى شئ فى الجبهة الداخلية، وإن أولى الناس بأن يعلموا الناس إنهم يستقروا وينتظموهم رجال العلم ورجال الدين.

وعلى هذا الأساس دا اجتماع كان عقد الساعة ١٠ صباحا، وعلى أساسه عقد اجتماع تانى فى نفس اليوم الساعة ٨ مساء فى إدارة الأزهر، ليحضره جميع مفتشى الوعظ والمعاهد الموجودين فى القاهرة. وقسمت عليهم المعاهد على مستوى الجمهورية كلها، وكل معهد أصبح فيه مفتش مقيم يتعاون مع الشيخ فى هذه المسائل، ويقوم بعملية تربية الطلاب ويشرف عليها بنفسه. وبدأت الأسفار من مساء الجمعة واستمرت فى صباح السبت، وأصبح جميع المعاهد عندنا فى الجمهورية متغطية بمفتشين موجودين الى جوار النظار، وعلى أن يكونوا بصلة منتظمة بناحيتين..

صلة أولى موجودة على طول بإدارة المعاهد.

وصلة ثانية بالمحافظ، فإذا حصل أى شئ يخطروا المحافظ ويدوا خبر فى نفس

الوقت للقاهرة.. إذا اتاخروا يدوا المحافظ والمحافظ يتصل بالقاهرة.

سرى للغاية

وبعد كذا اتصل بى السيد شعراوى جمعة فى مساء الجمعة وقال لى: إن فيه احتمال إن المحلة وبنى سويف وإن دمياط يكون فيها شئ من التحركات، وإن بنى سويف ودمياط اتصلوا علشان تحريك المحلة!

فبرضه بالليل فى حوالى الساعة ١١ أو ١٢ عملنا تأكيد على سفر إخواننا اللى هناك، وفى الصباح الباكر كنت موجود فى المكتب وعملنا متابعة على الطبيعة للى حصل هناك؛ فاتضح إن جميع المعاهد على مستوى الجمهورية محصلش فيها أى حاجة يوم السبت، وكانت مستقرة استقرار كامل. كان المفروض إن بعد المفتشين مايقوموا بهذا العمل نعمل اجتماع نجتمع فيه جميع المشايخ يوم التلات الجاى هنا؛ علشان خاطر نقدر نعمل اجتماع موسع لتعميق المفاهيم السياسية اللى ممكن يدوها للطلاب.

ولكن بعد هذا التطور السريع للأحداث، اجتماع التلات أطلته شوية لحد بس ما ينجلي الموقف؛ لأن بعنقد لو هم سابوا معاهدهم كلهم فى وسط هذا الأسبوع، برضه هتبقى المسألة يعنى حرجة شوية فهم موجودين ومعاهم المفتشين المقيمين دلوقتى على مستوى الجمهورية كلها.

دا اللى خلصناه لحد يوم السبت العصر، فبعد كذا المغرب كان عندى المحاضرة بتاع الاتحاد الاشتراكى، رجعت بالليل اتصل بى السيد شعراوى جمعة، وقال لى: والله المعاهد على مستوى التعليم العالى كلها هيكون فيها القرار اللى تفضلت سيادتك بالموافقة عليه. وبعد كده اتصلنا الصبح ويعنى سيادتك أنا كلمنى الأخ شعراوى جمعة الساعة واحدة، فحاولت أتصل بالتليفونات بالمسؤولين فى الأزهر لحد الساعة تلاتة فالتليفونات لم تستجب، وكانت الإجابة التقليدية والله التليفونات مابتشغلش بالليل! ولا أعلم دى مسألة برضه.. لدرجة الصباح اضطررت أستعين ببوليس النجدة علشان أتصل باخوانا علشان لازم ال staff يكون موجود فى المعاهد وفى الكليات علشان المعاونة فى عمل النظام.

دى هادى عليها تعليق بسيط لو أذنت لى سيادتك بيه، هو إن لحد النهارده مابانش مع القرار موقف هيئات التدريس، هل يكونوا كلهم موجودين فى فترة الإغلاق موجودين فى الكليات بتاعتهم، بحيث إنهم لو حصل بعض الطلاب حاولوا إنهم يروحوا كلياتهم لعقد اجتماع، برضه هم اللى يعنى يتصدوا لطلابهم ويقنعوهم بدال ما يبقى التفاهم ما بينهم وبين رجال الشرطة؟

فلو تفضلت سيادتك فى هذه الناحية باخذ قرار، إن هيئات التدريس فى هذه الفترة يكونوا موجودين على طول فى الأماكن بتاعتهم لأى توجيه يبقى يمكن لعل دا يساعدا.

سرى للغاية

دا فى الواقع العرض الموضوعى لما حدث فى هذه الأيام الثلاثة. أما ما يتعلق بوضع الأزهر ومشكلته، فأعتقد الليلة يمكن مش هو مجال الحديث فيها، وإنما أكتفى بكلمة واحدة.. وهو أن طالب الأزهر لو جينا نلخص حياته فإنه يحمل فى العام الواحد قد ما يحمل الطالب الثانى من معدل واحد ونص، ثم يقضى بعد هذا أربع سنوات بدل ثلاث سنوات. ومع هذا المسألة دى كلها مش مسألة متعلقة بالتعليم العام ولكن متعلقة بتطوير الأزهر، بحيث إن الثانوى بناعه يؤدى الى أوضاعه التقليدية والحديثة.. يعنى دا موضوع أرجو لو تأذن لى سيادتكم.

عبد الناصر: دا موضوع آخر، لكن العقبة المشايخ هم العقبة فى المواد، يعنى حاول أمين فى هذا الموضوع وحاول حسين المشايخ هم العقبة الحقيقية، هم خفضوا سنة أظن؟

هويدى: سنة واحدة كان فيه فرق سنتين.

عبد الناصر: هذا موضوع آخر، نسمع عن الأربع والخميس بس المنصورة. أيوه.

جمعة: هو الأربع - زى ماشرح الدكتور حلمى مراد - حصل خرجت مدرسة بنباقدان من هنا وراحت الخديوية علشان تخرجها، وبعدين حصل محاولات معاهم ورجعت مدرسة بنباقدان مرة ثانية.

فى المنصورة خرجت مدرسة الكامل الثانوية بمظاهرة، وانضم لها بعض طلبة المدارس الخاصة، واتجهوا الى المعهد الدينى وحاولوا يخرجوا طلبة المعهد الدينى ماخرجوش يوم الأربع فعلا، ورموا عليهم الحجارة وحصل بعض التلفيات زى ماقال الدكتور عبد العزيز كامل.

وبعدين اتفرقت المظاهرة، ومسكنا حوالى ٢٣ طالب وبعدين سيبناهم بعد التعهد عليهم بعدم التظاهر تانى.

يوم الخميس الساعة ٨،٤٠، تجمع بعض من طلبة المعهد الدينى قدام المعهد، وبعدين هو كان الطلبة بتوع مدرسة الكامل وهم بيكلموهم قالوا: إنتو جبناء! فأثاروهم، فهذا الموضوع كان من أحد العوامل الللى حمست طلبة المعهد الدينى، إزاي يبقوا جبناء ومخرجوش؟ فهيجروا يوم الخميس، وبعدين ابتدوا يخرجوا راحوا على مدرسة الكامل الثانوية علشان يخرجوها وبعدين الشرطة فرقتهم، وبعدين اتجمعوا مرة ثانية واتجهوا الى مدرسة

سرى للغاية

الصناعات ومدرسة الزراعة، واتجهوا الى شارع البحر ثم الى مبنى المحافظة ونصحهم المحافظ، ولكن قعدوا يتفرقوا شوية ثم تجمعوا بعد ذلك. وفي أثناء سيرهم كانوا بيقتفوا المحلات بالحجارة، وقذفوا المدرسة اليونانية ومدرسة العناية الإلهية والكنيسة ومدرسة البنات وتحطم كثير من النوافذ فى هذا الموقف، وكانوا بياخدوا عصى من فروع الشجر وماشيين. الحقيقة كانت التعليمات إن احنا بنحاول كشرطة نفض المظاهرة سلميا وبالنصح وبالإقناع، وكان المحافظ مشترك فى هذا إشتراك كبير فعلا. وكانت الهتافات متفرقة فى الوقت دا ضد قوانين التعليم وضد الشرطة وضد السيد وزير التربية والتعليم، وبعد كدا ابدتت تتطور فيه بعض الهتافات بايخة شوية وبعدين كانت الشرطة..

عبد الناصر: إيه.. قل لنا البايخ!

جمعة: يعنى كان بيقال بناء على كلام المحافظ إن واحد من الطلبة كان بيقول: أقبل.. أقبل ياديان!

مراد: أقبل.. أقبل ياديان!

جمعة: دا كان بناء على كلام المحافظ، وإن المحافظ قال: إن أنا نزلت أكثر من مرة فى هذا الموضوع.

مراد: أيوه شيخ كيف.

جمعة: حصل تفرق لما وصلوا الى مدرسة لقمان، علشان مايخرجوش بقية المدارس ويتعدوا الى المنطقة اللى فيها الجامعة. واستمرت العملية بهذا الشكل الى حوالى الساعة اتنين، لما تجمع عدد كبير منهم قدام مديرية الأمن. وكلمنى مدير الأمن وقال لى: دا فيه تجمع كبير وهم بيحاولوا إن هم يهجموا على مديرية الأمن! فأنا قلت له برضه: المحافظ فين؟ قال لى: المحافظ موجود فى المديرية. قلت له: طيب حاولوا تكلموهم وتقنعوهم وإذا حصل إن مفيش فائدة إبقوا أطلقوا طلقات رش فى الهواء.

بعديها بشوية كلمنى وقال لى: دول بيستعملوا، كان فيه بيارق متعلقة بمناسبة رمضان على أعمدة خشب، نزعوا الأعمدة الخشب وبيدفعوا بيها أبواب المديرية. والمديرية

سرى للغاية

مكانش فيها أكثر من تسعة اللي هم الحرس العساكر على الكراكون بتاع المديرية، وبعض الضباط والعساكر اللي هم أصيبوا من الطوب أثناء المظاهرات، فانسحبوا الى داخل المديرية. بعد كذا طلبنى وقال لى: دا حصل محاولة الاقتحام، حصل ضرب نار فى الهواء من الشرطة دفاعا عن أنفسهم فى عملية الاقتحام.

بعد ضرب النار، طبعا حصل تفرق فى العملية واتوجد الأربعة قتلى على بعد ٤٠٠ متر من مديرية الأمن. وهم كان فيهم واحد مزارع عمره ٦١ سنة، وطالب فى مدرسة الصنایع عمره ١٧ سنة، وطالب فى مدرسة الفلال الثانوية دى مدرسة خاصة عمره ٢٢ سنة، وطالب عمره ١٧ سنة بمدرسة الملك الصالح الإعدادية.

المحافظ قال فى كلامه وللسيد النائب العام والسيد وزير العدل أظن ومعاه رئيس مجلس المدينة: إن هو كان بيسمع صوت طلقات نارية أثناء المظاهرات. الحقيقة الواحد مش قادر يحكم دلوقتى هل كان فيه ناس معاهم أسلحة نارية وبتستخدم ولا لأ؟ هو حسب تحقيق النائب العام لحد دلوقتى، إن فيه عدد ٢٤ بندقية كشف عليهم طلع إن ماستخدموش فى ضرب النار، وفيه بندقية لسه مازالت تحت الفحص من الأسلحة اللي كانت موجودة فى مديرية الأمن مع العساكر.

عبد الناصر: معرفتوش البنادق يعنى؟

جمعة: الـ ٢٤ بندقية اللي كشفوا عليهم لم تستخدم.

عبد الناصر: هم اللي كانوا موجودين وقت الحادثة؟

جمعة: هم اللي كانوا موجودين وقت الحادثة، لقوا فيه بندقية واحدة هى اللي موجودة لسه تحت الفحص، إنما هو الحقيقة إن حصل طبعا ضرب نار من مديرية الأمن مفيش كلام.

عبد الناصر: ضربوا بايه بقى إذا كان البنادق ماستخدمتش؟!

جمعة: والله يصح من البندقية اللي تحت الفحص، النيابة أمرت بحبس ٢٧ طالب تم الإفراج أظن النهارده عن ٢٣ وفاضل ٤؛ اللي هم كانوا بيقودوا المظاهرة لم يتم الإفراج عنهم لحد دلوقتى.

سرى للغاية

النقطة اللى يمكن بالنسبة للتعليم العام هل ينطبق على المعاهد ولا؟ الحقيقة النقطة دى فيها شك يافندم؛ لأن حسب معلوماتنا بالليل نهارياها إن الشيخ عبد العزيز عيسى أظن هو مدير المعاهد، قال: دا بينطبق عليها، وإن الطلبة فى المعاهد الدينية هتتأثر بقوانين التربية والتعليم. الحركة بتاعة بنى سويف والمحلة هى جوابات أرسلت من المعاهد الدينية الى بعض الطلبة، وقالوا لهم: إن احنا هنتأثر قطعا، وكل واحد يكتب طلباته ويبعثها فى مذكرة الى الرئاسات الخاصة بالمعاهد الدينية علشان يوضحوا لهم مدى التأثير فيه. دراسة عملها أظن كمان الاتحاد الاشتراكى فى القاهرة، وفى هذه الدراسة إن طلبة المعاهد الدينية هتتأثر تأثر كامل بقوانين التعليم العام، والحقيقة النقطة دى لسه عايزة توضيح كامل.

عبد الناصر: قل لنا.

أبو نصير: بعد سيادتك ما اتصلت بى اتصلت بالنائب العام وأصدر قرار بانتداب وكيل التفيتش للإشراف بنفسه أيضا والإشراف بالتحقيق ورئيس نيابة ومفتش من هنا وسافرنا، ولأقينا هناك المحامى العام كان رجع مصر ورجع على طول فى المنصورة، والمحامى العام بتاع محافظة الدقهلية موجود ويشرف على التحقيق ورئيس النيابة، وكانوا بيجمعوا كل وكلاء النيابة الموجودين هناك وزعوا عليهم العمل للبدء فيه، بدء العمل فعلا من حوالى الساعة ٨ واستمعوا الى التحقيق.

وتقريبا زى الملخص ما قال إخواننا أحب أكرره بسرعة، إن يوم الأربع هى مدرسة الكامل اللى راحت طلبت من المعهد الدينى إنه يخرج، إنما يوم الخميس الأقوال مستقرة على إن المعهد الدينى هو اللى راح هاجم مدرسة الكامل وأخرجهم، وخرج معاهم الى منطقة المدارس الأخرى. هنا فيه نقطة فى التحقيق برضه بنحب نقولها بصراحة مش متسجلة فى التحقيق: إن وكيل المعهد كان مراوغ جدا وخذ معنا فى التحقيق حوالى ساعة ونص وأنا كنت حاضره بنفسى؛ مرة يقول: مفيش حد جه فى المعهد، مرة الأبواب مفتوحة مرة الأبواب مقفولة مرة دخل خمسين وأنا ماشوفتش حد! وبعدين هو قال للمحافظ: إن المظاهرة دى كلها مفيش فيها ولا واحد من رجال المعهد الدينى، فلما جيبنا له ستة من المقبوض عليهم من المعهد الدينى قال: الحقيقة دول أنا مآقدرش أميزهم وأعرف من فيهم من المعهد مين فيهم مش من المعهد! دى نقطة على الماشى. بعد كده سألنا إحنا مدير الأمن..

عبد الناصر: وشيخ المعهد مكانش موجود؟

سرى للغاية

أبو نصير: لا.. شيخ المعهد مكانش موجود، دا وكيل المعهد نفسه وبعدين هو سألناه أيضا فى النقطة دى، إنه رأيه الشخصى إن قوانين التعليم ستنطبق لأن الدراسة ستنقسم الى قسمين قسم: دينى وقسم مدنى. ويرى أن القسم المدنى تنطبق عليه القواعد اللى هى بتاعة التعليم.. ده رأيه هو وده انعكس على بعض الطلبة لأن إذا كان وكيل المعهد يرى هذا الرأى لأنه قال: أنا رأى الشخصى كدا!

هو الملخص بعد ما أخرجوا المدرسة، مروا على مدارس تانية مدارس خاصة تجاوزت بسرعة، هل كان تأثير نظار المدارس فى الوقت الحالى فى الدراسة خاص بأصحاب المدارس الخاصة ولا؟ إنما مشيت المظاهرة الى حوالى الساعة ١٢ تقريبا، وبعدين كان معاهم المحافظ والاتحاد الاشتراكى ونصحوهم بالتفرق وابتدوا يتفرقوا فعلا الى أنحاء مختلفة.

هنا بقى نقطة غامضة، ظهرت اشاعة إن عدد كبير أعتقل وإن فيه بعضهم مات وبعضهم بينضرب فى مديرية الأمن! بسرعة فى حوالى ساعة حصلت تجمعات فى الميدان أمام مديرية الأمن حوالى العدد بيقدروهم بين ٥ آلاف و ٦ آلاف، وابتدوا يهاجموا مديرية الأمن بشدة. قلعوا أكشاك الحراسة كسروها وولعوا فيها النار، وعملوا العمدان بقوا يعملوها كمزاريق ويضربوا بيها بالأبواب، فحسوا إنهم محصورين ويظهر البوليس ضرب أعيرة نارية. الإصابات الأربعة القتلى والأربعة مصابين بأعيرة نارية كلها - زى التعبير بتاع الطبيب الشرعى - مقذوف مفرد سريع يصدر من بنادق سريعة وليست من أسلحة صغيرة؛ هى تقريبا من النوع بتاع البنادق الـ Atchik اللى موجودة هناك عندهم.

تقرير الطبيب الشرعى بتاع هناك قال لنا شفويا مارضيش يقدم كتابة: إنه فحص البنادق وجد بندقية مطلقة حديثه نمرة ٣٣٠١١ و ٢٤ بندقيه كلهم مزيتين إنما هو ميقدرش يتحمل مسؤولية كتابة هذا التقرير، بعث يجيب كمان اتنين أطباء شرعيين من القاهرة يشاركوا معه فى تقديم التقرير كتابة.

دا ملخص الموضوع.

النقطة التانية الغامضة اللى مش عارفين نوصل لها: إنه كان القائد الفعلى لهذه المظاهرة شخص كفيف محمول على الأكتاف هو اللى بيهدف الهتافات العدوانية كلها، وهو اللى يقود المظاهرة! لغاية دلوقتى مفيش ولا واحد جراً إنه يرشد عليه حتى ولو رجال المباحث هناك بيقولوا: منعرفش! إنما كل اللى بيجمع على إنه شخص كفيف هو كان يقود المظاهرة وهو اللى كان بيتولى الهتافات العدائية كلها.

سرى للغاية

إحنا قبضنا على ٢٧ فيه ١٧ قبض عليهم و٧ كانوا مصابين اعتبروا المصابين أيضا متهمين، وتم التحقيق معاهم كلهم فكلهم بيقولوا: إحنا أصبنا أثناء سيرنا بنتفرج على المظاهرة بس! فتم الإفراج على ٢٣ وفاضل الأربعة، والأربعة واحد منهم اسمه جمال هو اللي نزل وكسر الكشكين وولع فيهم النار، وتلاتة تانيين كانوا بيساعدوه فى إشعال النار. هم دول الأربعة اللي مازال مقبوض عليهم لغاية دلوقتى، والنيابة لسه بتستفسر عن الموضوع، وهى يمكن أهم نقطة اللي عايزين معاونة الداخلية فيها من هو الشخص الكفيف اللي بدأ بالقيادة الفعلية للمظاهرة وهو اللي كان بيهتف الهتافات العدوانية.. دا لم نصل اليه بعد !

البرلسى: إحنا الجامعات بدأت بعد المنصورة.

عبد الناصر: آه.. من يوم السبت.

البرلسى: هو يافندم أنا أخطرت باللى حدث فى المنصورة بواسطة السيد وزير الداخلية والسيد الدكتور لبيب شقير مساء الخميس، اتفقنا إن إحنا نعد لقاءات أثناء يوم الجمعة مع زملائنا ومع المسؤولين فى جامعات القاهرة وعين شمس، وحصل وروحنا الاتحاد الاشتراكى وقعدنا نتكلم عن زملائنا مدة طويلة بهدفين..

الهدف الأول: ياترى هيكون إيه انعكاس حوادث المنصورة على الجامعات!؟

الهدف الثانى: إنه يبقى واخدين بالننا بكره الصبح فى الجامعات هيحدث إيه ولا

مش هيحدث إيه.

يوم السبت بقى تم كدا الكلام دا فى القاهرة وعين شمس إسكندرية وأسيوط تركناها للتنظيم اللي هناك وإسكندرية كذلك. وبعدين اللي تم الصبح فجر حتى يوم السبت كلمنى السيد مدير جامعة إسكندرية وقال لى: علمت إن فيه طلاب من المنصورة اللي هم طلاب كلية الهندسة جامعة إسكندرية، مجتمعين أثناء الليل بيحضروا لاجتماع كبير تانى يوم الصبح، وحدث فعلا إن طالب تانى يوم الصبح كان فى كلية الهندسة بيعلق إعلان علشان اجتماعات الساعة ١١ مؤتمر عام فى الكلية لدراسة - هو سماها - أحداث المنصورة. وبعدين قالوا له: لأ.. لازم تاخذ إذن العميد، وبعدين الساعة ١١ تجمعوا الطلبة وراح لهم مدير الجامعة ووكيل الجامعة وقعدوا معاهم والعميد عبد السميع، وقعدوا سوا والولاد بدأوا بيقوا بسرعة جدا عدائيين، وبدأوا يهتقوا وبدأوا يتجمعوا وعاوزين يطلعوا فى مظاهرة للاحتجاج على حوادث المنصورة.

سرى للغاية

عبد الناصر: كانوا قد إيه بقى اللى كانوا فى المؤتمر؟

البرلسى: كانوا مئات ٧٠٠ - ٨٠٠ عدد ضخم من طلبة كلية الهندسة فى الأول وبعدين الإقناع معاهم مانفعلش. وبعدين وصل السيد محافظ الإسكندرية والإقناع معاهم منفعلش وخرجوا - متأسف المحافظ جه بعد الخطوة الجاية - وخرجوا برضه فى مظاهرة، والبوليس فرقهم بالعصى تارة جريوا شوية وبعدين ضرب حبة رش برضه جه فى بعض الطلاب؛ فالطلبة هاجوا أوى ودخلوا تانى إحتموا بالكلية والهياج والتحدى زاد أوى. فى الساعة دى وصل السيد أحمد كامل، وبعدين كان برضه استقبال الطلبة استقبال سئ وهو لولا عنده لباقة ومرونة كثير كان يعنى اتضايق أكثر من كده، وقعدوا معصلجين معاهم مع المدير ومع العميد ومع الجماعة اللى معاهم، وبعدين أفتعوهم طب تعالوا نتكلم ودخلوا المدرج وأنهم يتكلموا مفيش فايدة أبدا! فيه كام واحد طبعا معروفين بالإسم هم اللى متولين هذه الإثارة وهذه العصلجة فى قلب المدرج. فى الآخر قالوا لهم: طيب مش هنعرف نتكلم هنا، هاتولنا أعضاء الاتحاد نقعد سوا نتكلم فى أوضة وخليكوا إنتو مستنيين. واجتمعوا بعد كدا مع أعضاء الاتحاد طول النهار وإحنا وياهم على التليفون باستمرار من غير نتيجة اطلاقا! الولاد برضه هايجين وابتدوا يقدموا مطالب وابتدوا يقولوا: إن مايصحش البوليس يتصدى أو الشرطة تتصدى للطلبة بهذا الأسلوب، ومايصحش تضربوا بالرصاص ولا بالرش وطبعا كلهم كانوا زعلانين. كل المطالب من الأخ شعراوى جمعة! (ضحك) وحولوا بقى على حاجات تانية فى مطالبهم قالوا: حرية الصحافة وحرية وحولوا على حاجات ليست لها علاقة..

عبد الناصر: قانون الحريات! (ضحك)

البرلسى: حولوا فى مطالبهم - زى ماسيادتك علمت - على موضوعات ليست لها علاقة بموضوع الاحتجاج، وقرروا الاعتصام والإضراب عن الدراسة إضرابا تاما لحين ما تجاب هذه المطالب.

سرى للغاية

وبعدين بالليل خدهم كمان السيد المحافظ ومدير الجامعة وأمين الاتحاد الاشتراكى فى المكتب عنده أعضاء الاتحاد علشان ينكلم معاهم تانى برضه ولحد الساعة ١١، قال: طيب إحنا هنطلب من السيد الرئيس يألّف لجنة كبيرة تحقق فى كل الموضوع دا وتعرفوا إيه الحكاية بالتفصيل. وبعدين اتضح إن الولاد بتوع أعضاء الاتحاد سيطرتهم على الجموع دى كلها مش هيكون لها فاعلية، وإن الكلام دا حتى اللى تعبوا قلبهم فيه مش هيقدرنا ينفذوه ويلتزموا بيه. وبدأ ييجى طلبة من كليات تانية تروح معاهم فى كلية الهندسة من الزراعة والتجارة، وبعتولى تلغرافات فى مصر يومها قالوا لى: إن الطلبة معتصمين لحد ما تجاب المطالب وكذا وكذا. وبعدين بدأوا يوزعوا المنشورات وهم معتصمين وزعوا المنشورات دى فى الشارع وعلى الناس اللى ماشيين وفى العربيات والحكاية خدت شكل قاسى. وبعدين حاولوا يقنعوهم عدد من الأساتذة اللى لهم علاقات كويسة مع الطلاب، لحد الساعة ١١،٣٠ - ١٢ مقدروش يوصلوا معاهم لحاجة برضه لإصرار مجموعة صغيرة على الإثارة وعلى التحدى وعلى الإصرار على الاعتصام والإضراب.

هنا الوقت اللى اتصلنا بالدكتور بغدادى والسيد أحمد كامل، الوقت اللى اتفقنا إن لأ.. الموقف مايتسابش كدا ولازم الدراسة تتعطل. ودعيت السادة مديرين الجامعات القاهرة وعين شمس تحدثنا فى الموضوع، وكان فيه احتمالات اللى بلغناها اللى هى تعطيل الدراسة فى جامعة إسكندرية.

أثناء النهار بقى كان فيه اجتماع فى هندسة القاهرة، اجتماع كان ظاهره بهدف إن فيه طلاب متحمسين عايزين يشرحوا لزملائهم حقيقة ماحدث فى المنصورة. بدأت ٤٠٠ طالب يشرحوا لهم ومين بقى الطلاب دول اللى هيقدرنا يسيطروا على اجتماع زى دا! دخلوا برضه الطلاب فى مناقشات أخرى فى كل حاجة، واتفقوا إنهم برضه عملوا بيان وعلموا مطالب ولازم نشرها فى الصحف، ويكره يجتمع - اللى هو النهارده - بقى عشرة صباحا علشان نتابع هذه الأعمال، ولو محصلش هنعمل وهنعمل وهنعمل! وبعدين سمعنا إن العدوى دى بنتنتشر فى كليات أخرى فى جامعة القاهرة.

فكانت المناقشة إمبراح بالليل - زى ماسيادتك علمت - إن جامعة الإسكندرية أكيد لازم تقف فيها الدراسة ويتفك هذا الاعتصام، وبعدين لو قفلناها وحدها كان من المؤكد هننقل القاهرة وعين شمس النهارده بس بالليل بعد مايكون حصل خوتة تانية مشابهة للى حصل فى جامعة إسكندرية.. ودا اللى خلانا اتفقنا على إيقاف الدراسة فى كل الجامعات والمعاهد العليا.

سرى للغاية

النهارده أنا وصلت إسكندرية وجيت قبل اجتماعنا علشان أشوف برضه وأسمع مباشرة من الأخ أحمد كامل والدكتور بغدادى، وأشوف الهندسة هناك يعنى الاعتصام فيه طلاب حقيقى فى الكلية لكن الحكاية مفرولة ومفيش عنف ولا حاجة. واتنقت مع الأخ السيد وزير الداخلية إن الحصار على المنطقة بتاعة الكلية يبقى أقوى علشان محدش جديد يخش؛ لأن أثناء النهار كان فيه شوية ناس بتخش للطلبة جوه سواء كليات تانية وقلة من بعض المدارس الثانوية.

هنا فى مصر بدأت بقى ظاهرة جديدة، اللي هى بعض المعاهد وبعض الجامعات مثلا جامعة أسيوط فوجئت بالخبر ووقف الدراسة، الصبح زعلوا وقالوا: ليه قفلتوا لنا الجامعة إحنا مش عايزين حاجة وكويسين؟! وبعدين خدوهم الأساتذة والمدير والمحافظ وراحوا فى المدرج، وقعدوا يتكلموا معاهم طول النهار وشرحوا لهم الدنيا وكل حاجة، وقالوا لهم: من الأفضل ياخذوا اجازة شوية لغاية ماتهدأ الأمور من الجامعة، كان معايا دلوقتى على التليفون السيد محافظ أسيوط.

بعض المعاهد فى بلاد زى الزقازيق ومعهد منهم فى المنصورة، برضه بيتساءلوا.. إحنا معملناش حاجة ومفيش داعى لوقف الدراسة، قلت لهم: لا الكلام دا يجينا يعنى مكتوب يقولوا: إحنا رأينا إيه ويكتبوا ويقولوا لنا وبعدين نفكر فيها. فيه قلة من المعاهد عندهم امتحانات وسمحنا بذلك علشان مانعطلش الدنيا، لكن عدد محدود فى حته محدودة خيلنا الامتحان ماشى فى معهد أو اتنين لأنه كان مقرر قبل كدا.

الحالة عامة أنا ماشوفتش أحداث، الأخ شعراوى فيه شوية احتكاك حصل عند كوبرى الجامعة أنا كنت فى إسكندرية ماشوفتوش بنفسى، لكن الأخ شعراوى ممكن يبقى يتكلم عنه.

الحالة عموما فى عين شمس كانت هادية خالص النهارده، مكانش فيها غير حالة واحدة.. واحدة عين شمس مالهاش علاقة برضه بالمنصورة، إنما زى ماتقول سيادتك انتهزوا الفرصة ويلا سألوا على المدرس اللي عندهم فى آداب عين شمس اللي اعتقل لأسباب يعنى اتهامه فى..

عبد الناصر: هو قبض عليه مش اعتقل!

سرى للغاية

البرلسى: متأسف.. للأسف أنا غلطة قانونية فى الكلام، قبض عليه وحقق معاه. السيد وزير العدل كان فى منتهى الحكمة، والتصرف كان إن العميد خد الطلبة وراح قابل السيد وزير العدل للنائب العمومى وقال لهم: لا.. دا لا إعتقل ولا حاجة الراجل دا متهم فى كذا وقبض عليه وحقق معاه وهو معترف وكاتب. فدى برضه بعدين عملنا اتصال مع بتوع الآداب وبتوع الحقوق علشان يبصروا الناس، وكان انتشر إن فيه واحد أعتقل. وبعدين راحوا ناس من آداب لبتوع هندسة، وكان هيحصل النهارده بقى الشوشرة على حاجة تانية زى ماتقول حضرتك آهى تلكيكة علشان تمشى سلسلة من الإضرابات أو الاعتصامات.

يمكن دا ملخص ماحصل، الليلة أعتقد الدنيا هادية ولو إن لسه فيه طلاب فى كلية الهندسة فى إسكندرية حوالى قبل ما آجى المغرب حوالى ٢٠٠. هو الغربية - زى ماتفقت مع السيد وزير الداخلية دلوقتى - إن هم فطروا هيشربوا شاي زى مايكونوا هيعملوها قهوة؛ فاتفقنا إنهم لازم يتحبسوا علشان يطلعوا يسرسبوا ودايما بتاخذلها يوم واتنين وبتخلص الاعتصام؛ لأن مفيش تانى هدف من بقائهم ولا فيش اتصال بيهم بعد كدا. مصر مافيهاش حاجة دلوقتى على قد ما أعلم، وأعتقد هنستمر شوية فى هذا الإجراء.

الطلاب واضح جدا بعض أسماء والمحليين كلهم عارفينهم اللي هم أثاروا هذه البلبلة وأثاروا هذا القلق، وهل دى لها علاقة بانتخابات اتحاد الطلاب؟ هل فيه دوافع أخرى سياسية غير مسألة المنصورة اللي هى جت فى رأبى أنا كحجة مش سبب أساسى، ولأ مفيش دوافع ونوع الدوافع إيه؟! كل دا عاوز بحث سياسى قطعاً. وبعدين من حيث الطلاب، أنا فكرى - إذا أذنت أكمل يعنى الكلام - إن الطلاب اللي هم شوهدوا وعرفوا باثارة الشغب فى هندسة الإسكندرية واثارة هذا القلق الشديد لازم يقدموا للمحاكمة فوراً. وإحنا عندنا فى قوانين الجامعة ما يسمح بعقابهم لحد الفصل النهائى من الجامعات ودا بيكون رادع، ورأبى إن لازم برضه ناخذ خطوات فى هذا الطريق لأن المسألة مش تلكيكة ومش حجج علشان بس إثارة اضطرابات!

وتحت أمر حضرتك إذا كان فيه حاجة مش واضحة.

عبد الناصر: هو أنا يوم الخميس قلت لشعراوى: إنه لا يسمح بمظاهرات بأى شكل من الأشكال وقلت له: إن العساكر تطلع بالسلاح ومحدث يطلع من الجامعات؛ لأن طبعا أنا عارف إن ممكن ولاد يتلكوا خصوصا أولاد الجامعة طمعانيين على أساس اللي حصل فى فبراير اللي فات والنصح ومعملناهمش حاجة.

سرى للغاية

والواحد عارف الأمور دى إزاي بتتطور، وطبعاً كونهم يطلعوا من الجامعة ويمشوا فى الشوارع هتتطور الأمور كما تطورت يوم الخميس ولكن الى أكثر من هذا. فحتى يعنى أنا قلت له: لازم العساكر تطلع بالسلاح ولا يسمح لأى طالب إنه يطلع برا الجامعة، تستخدم كل الأسلحة بما فى ذلك ضرب النار. يعنى دى كانت الأوامر يوم الخميس، ولأ قلت له: يعنى بهذا نبقى بقى البلد مفيهاش حكومة ويبقى العيال دول فاكرين إن احنا خايفين منهم!

دا كان كلامى الحقيقة؛ لأن عملية يوم الخميس تركت المظاهرة من الساعة ٨,٣٠ الصبح لغاية الساعة ٢ بعد الظهر، والمحافظ بيتكلم ويتوع الاتحاد الاشتراكى بيتكلموا وبينصحوا.. مفيش فائدة!

الحقيقة النتيجة هى طمع أكثر ووقاحة أكثر وقلة أدب أكثر، وأنا الحقيقة المحافظ بتاع إسكندرية راح الجامعة إمبراح من غير أنا ما أعرف، وأنا لو أعرف ماكنتش خليته يروح!

البرلسى: هو كان ها يروح بطبيعته بل بالعكس هو أفاد جدا جدا جدا.

عبد الناصر: لأن هو برضه اللي أنا فهمته، إن الولاد كانوا قللات الأدب جدا مع المدير أيضا هزقوه، ومع المحافظ أيضا كان فيه وقاحة وقلة أدب وقلة تربية يعنى.

البرلسى: هم كام واحد معروفين يافندم.

جمعة: هو لو سمحت لى سيادتك، هو يوم الخميس بعد تطور أحداث المنصورة إحنا اتصلنا باتحاد الطلاب وبعنتاهم المنصورة علشان ياخدوا صورة كاملة عما حصل فى المنصورة، وطلب منى اتنين طلبة من كلية الهندسة اللي هم فريد حسنين وإبراهيم نفاذى إن هم يروحوا الاتنين، وأنا قلت يروحوا وراحوا علشان يشوفوا الموقف فى المنصورة على الطبيعة. لما تطورت الحوادث يوم السبت، أنا حتى كلمت حسن عيد وخليته راح ومعاه عادل عزب - اللي هم رئيس الاتحاد والنائب بتاعه - يتوجهوا من المنصورة الى الإسكندرية علشان يشرحوا الصورة اللي هم شافوها فى المنصورة.

سرى للغاية

هو الصبح فى الإسكندرية إتوجدت - اللي هو يوم السبت يوم ٢٣ - عدة إعلانات فى أماكن متفرقة من الكليات والمدارس، بتدعو الطلبة الى التظاهر والإضراب وقوفا الى جانب زملائهم فى حوادث المنصورة، وشيلنا إحنا هذه الاعلانات. وبعدين هو كان فيه بقى اتنين طلبة أساسا من المنصورة فى الهندسة، وهما دول ابتدوا يثيرو الكلام مع بعض الطلبة المغتربين اللي موجودين، حوالى ١١,٣٠ خرج من كلية الهندسة فى صورة مظاهرة حوالى ٦٠٠ طالب، وكانوا بيشتمو ضد وزارة الداخلية والشرطة، وراحت كلية الزراعة لإخراج الطلبة متجاوبتش كلية الزراعة، تصدت لها الشرطة وفرقتهم وعادوا للتجمع مرة ثانية قدام الكلية وأخذوا يستعملوا الطوب ويضربوا الشرطة بيه. الشرطة طبعا أطلقت الرش فى الهواء، وطبعا ضرب الرش فى الهواء بتحصل إصابات، أصيب ستة طلبة وراحوا المستشفى.

لما دخلوا الكلية القصة اللي جيه، كنا إحنا مسكنا أربعة طلبة من المتزعمين العمل منهم عاطف الشاطر اللي هو أمين اتحاد طلبة جامعة إسكندرية، وفى الوقت نفسه هو طالب فى كلية الهندسة. لما وصل المحافظ طلب علشان حل الموقف إن احنا نسيب الطلبة، وسيننا الطلبة فعلا وبعثناهم للكلية وتم التفاوض والمناقشة بينها وبين المحافظ، وبعدين فضل حوالى عدد من الطلبة.

عبد الناصر : الشاطر دا مأصبيش ولا حاجة!؟

جمعة: الشاطر لأ.. مأصبيش، وبعدين ابتدوا بالليل يكتبوا منشور، وابتدت الطلبة توزعه على الأتوبيسات وبعض الطلبة ودوه الى القنصليات! ودى الحقيقة جابت نتيجة عكسية جدا بالنسبة لهم؛ خصوصا فى الإسكندرية إبتدوا العمال يهزقوهم ويشتموهم على إن هذا العمل الصيبانى عبارة عن عمالة، وليس من الوطنية فى شئ إن الواحد يودى منشورات الى القنصلية.

طبعا الطلبة فى المنشور عاملين طلبات زى ما اتوضحت، اللي هى إقالة وزير الداخلية والتحقيق معه علنا، محاكمة المسؤولين فى الشرطة عن حوادث المنصورة والإسكندرية، رفع الرقابة على الصحف ورفع سيطرة وزير الإرشاد، منع العنف مع المواطنين، الاشتراك فى إعداد قوانين التعليم، وبعدين سقوط جميع الشعارات وتحقيق التغيير الذى جاء فى بيان ٣٠ مارس.

عبد الناصر: سقوط إيه؟

جمعة: سقوط جميع الشعارات.

مراد: مجتمع الشعارات!

جمعة: دولة الشعارات! بالليل ابتدينا إحنا نمسك الطلبة اللي هم بيوزعوا المنشورات فى الأتوبيسات.

دا اللي حصل يوم السبت.

النهارده بعد صدور قرار تعطيل الجامعات، حصلت تسلل الى الكلية من بعض الطلبة وزاد العدد وصل الى حوالى ألف الصبح، وخرجت بعض المظاهرات من بعض المدارس الثانوية اللي فى المنطقة. وفرقت المظاهرات فورا وفضلوا الطلبة قاعدين وابتدوا من الضهر يخرجوا، وأصبح العدد حوالى ٢٠٠ واحد هو اللي موجود داخل الكلية النهارده. دا اللي حصل بالنسبة لإسكندرية.

بالنسبة للقاهرة وعين شمس، مفاجأة لهم تعطيل الجامعات على أساس إنه محصلش حاجة فى جميع الكليات وكانت منتظمة، وكانت حركات إسكندرية إمبارح محل استياء كثير من الطلبة.

الى حصل النهارده الصبح، إن تجمع الطلبة عند تمثال نهضة مصر فى مدخل جامعة القاهرة، وحاولنا إن احنا نفرقهم وننبه عليهم على إن الجامعات متعطلة، كان بعضهم بيستجيب والبعض لا يستجيب وزاد العدد حتى وصل لحوالى ٣٠٠ طالب. وبعدين حاولوا إن هم يقعدوا على الأرض، وبعضهم حاول إن هو يقتحم كردون العساكر علشان يصل للجامعة. وبعدين اضطررنا فى الآخر إن احنا نستعمل القوة ضررنا بالعصى وضررنا طلاقات رش فى الهواء وقنابل مسيلة للدموع. تفرقوا ومشيووا، قبضنا على عدد منهم وبعدين الباقي اتفرق وعدوا كوبرى الجامعة، وحبوا يقفوا عند جامع صلاح الدين حوالى ٤١ واحد مسكناهم برضه وممسوكين لحد دلوقتى.

فمفيش أى حاجة حصلت بعد كدا فى جامعة القاهرة أو عين شمس أو أى جامعات أخرى، ما عدا أسيوط اللي هو الكلام اللي قاله الدكتور البرلسى.

سرى للغاية

المعتقلين دلوقتى أو الممسكويين من الطلبة حوالى ١٤٨ واحد، الجيزة مسكت ٣٨، والقاهرة ٤١ اللى هم كانوا متجمعين حوالين جامع صلاح الدين، الإسكندرية ٦٩ فيهم بعض مش من الطلبة لأن بعض مظاهرات ثانوى كان اندست فيها بعض الأفراد الآخرين. بنبحث موقفهم النهارده كل العملية وهنتعرض النتيجة على سيادتك.

عكاشة: إذا سمحت النهارده الصبح السيد وكيل الوزارة اتصل بى علشان يعرف هل القرار اللى صدر هيسرى عليه ولا لأ؟ فقلت له: يجتمع باتحاد الطلاب، فاتحاد الطلاب قال: لا داعى إطلاقا لإغلاق المعاهد، وإن الدراسة تستمر ولكن طالب بمزيد من المعلومات الصحيحة أكثر من اللى موجودة فى الصحف؛ علشان يستجبروا ليها لأن عندهم أزمة ضمير ويخشوا أن يكون زملاؤهم فى المعاهد الأخرى والكليات الأخرى يعايروهم! فوعدت إن أنا أعمل مع حضرتك جلسة مجلس الوزراء أروح أقابل الطلبة، فلو سمحت سيادتك إن أقوم بهذا العمل والدراسة تستمر.

عبد الناصر: يا أخى هتروح تقابل الطلبة هيهزقوك! يعنى ده اللى هيحصل الحقيقة الموضوع أصله إنك تقفل خمس معاهد؛ خصوصا فيه عندك مجموعة فى الفنون الجميلة اللى فيه علما دا متصل بالشيوخيين.

عكاشة: يعنى تعلق المعاهد خالص يافندم؟

عبد الناصر: آه أحسن، مش موافق إنك تروح خصوصا إنك يعنى هينرفزوك بعد دقيقة! (ضحك)

أصوات: (ضحك)

عبد الناصر: إذا كنت من غير ماتروح تقدر تمشى كان بها لكن هيروحوا لهم الناس، فالأحسن إن احنا نقفل ونحل الموضوع كله بقى. الحقيقة أصلا أنا الواحد عنده صورة عما يجرى فى كل العملية، وإحنا سايبين العملية خالص - زى ماقلت لكم قبل كدا - إحنا لم نعتقل حد غير الثلاثة اللى اعتقلناهم من بعد فبراير اللى فات ولا حد. وبعدين أنا بقرأ جرايد الحائط ويشوف كل حاجة بنفسى، وفيها كلام لما الواحد يقراه يعنى يخرج عن شعوره! العملية الحقيقة منتهى قلة الأدب ومنتهى الاستهانة ومنتهى الوقاحة! معرفش عندكم فكرة عن الكلام؟ ويعنى العملية هى محاولة مباراة فى الجدعنة!

سرى للغاية

فأنا فى رأى الحقيقة إمبراح لما وافقت على القفل، فقوت القفل على إن مش هنتح إن شاء الله يعنى إلا إذا كانت الدراسة تنتظم. هو العملية هى هل فى حكومة فى البلد أو مفيش؟! أو هل الطلاب هم اللى يحكموا؟! وبعدين هل الحرية إن هم يطلعوا فى الشوارع ويكسروا المحلات زى اللى حصل فى المنصورة؟! يعنى طالعين إمبراح الهتافات أين الحرية؟ أين قانون الحريات؟ وبعدين أيضا الأساتذة فى البعض بيستثير الطلبة، برضه إمبراح أستاذ أظن فى كلية الحقوق بيقول: فى أساتذة أعتقلوا وأساتذة قبضوا عليهم.. اللى هو الأستاذ اللى قبض عليه. هو فى عملية منشورات بتتوزع اسمها حركة تحرير مصر، بتعمل منشورات بتتوزع على الطلبة وفيها كلام، وبعدين عرف مين اللى بيطلعها ومين اللى بيوزعها فطلع هو الأستاذ اللى اسمه أحمد فايق، والنيابة قبضت عليه وحققت فى العملية.

غانم: فى كلية الآداب يافندم.

عبد الناصر: لكن لأ.. الأستاذ اللى كان إمبراح بيتكلم بيقول فىه أستاذ..

غانم: ماعلش دا لم يقبض عليه وسافر.

عبد الناصر: كان إمبراح بيتصل بكل الكليات وكان بيقول..

البرلسى: كان بيصورها على إنها مصادرة لحرية الفكر وإحنا بنقول محاضرات..

عبد الناصر: العملية يعنى أبعادها بقت كثيرة، فى الحقيقة أنا رأى كان إمبراح مانقلش الجامعات، واللى يطلع برا الجامعة نضربه على أساس إن البوليس بيستعد، واللى بيطلع يعنى بنثبت إن فى دولة ونضرب اللى بيتعور يتعور واللى بيموت يموت واللى يحصل يحصل. الحقيقة الساعة واحدة بالليل اتصلت بشعراوى واتصلت بلبيب شقير وقاعدين هم طول النهار، وقالوا لى: إن وزير التعليم العالى ومدير الجامعات كله بيطالب بالقفل؛ على أساس برضه إنه الصبح النهارده محدش ضامن إن كلية الهندسة.. وكلية الهندسة من إمبراح يظهر اتفقوا على إنهم يطلعوا مظاهرة. وكلية العلوم فيها القيادة الشيوعيين اللى فيها الحلوجى والمجموعة اللى معاه، قالوا: إذا طلعت كلية الهندسة يبقى لازم كلية العلوم تطلع.

سرى للغاية

فقلت: طيب يبقى بننقل مش زى الدور اللي فات نقفل ونفتح بعد أسبوعين؛ بننقل ونشوف مش هنتفتح إلا إذا كنا بنؤكد سلطة الدولة.

بالنسبة للقيادة السياسية، ودا موضوع اتكلمنا فيه قبل كدا من السنة اللي فاتت وفى الصيف، أنا رأيى إن عملية المعسكرات كل دا كلام فاضى - وأنا قلت لكم هذا الكلام قبل كدا - ولا يوتى ثمار بأى شكل من الأشكال. طبعا هي الحقيقة المشكلة فى الجامعات إن كان التنظيم السياسى اللي فى الجامعات هو منظمة الشباب، فلما وقعت منظمة الشباب بقى فيه فراغ كبير أوى وكل واحد النهارده بيحاول ياخذ فرصة القيادة. وعلشان نعمل تنظيم، طبعا دا هيتحتاج الى بعض الوقت ومش عملية سهلة، وفى نفس الوقت فيه ناس برزت اللي هم اعتقلوا السنة اللي فاتت وأفرج عنهم وبقوا زعماء؛ دول موجودين والتصدى ليهم عملية مش سهلة عملية صعبة. فى نفس الوقت فى ناس كثير كويسين، يعنى مثلا كلية الهندسة فى القاهرة فيها حوالى سبع آلاف، اللي راح المؤتمر حوالى ٤٠٠ الباقى عدد كبير جدا مش موافق على هذ الكلام.

اللى طلوعوا فى إسكندرية فى المظاهرة ٦٠٠، وعدد الطلبة فى كلية الهندسة برضه حوالى ستة آلاف، وراحوا كلية الزراعة مرضيتش تطلع معاهم، والعملية هي فيه عناصر موجودة فى الجامعة باستمرار هتخلق هذه الإثارة. الحقيقة الجامعة إحنا مش عايزين خريجين لأنهم بيكلفونا كل سنة ١٠ مليون جنيه وإحنا عندنا كفاية من الخريجين، وإحنا مستعدين نقلها لغاية إزالة اثار العدوان.. والله يعنى.

حجازى: لو سمحت لى يافندم أنا حضرت مؤتمر النهارده، بالصدفة كان فيه مؤتمر فى الشرقية وعلمت إنهم خرجوا فى مسيرة من المعاهد.. مسيرة صامتة يعنى هادية تحت حراسة البوليس، وبعدين اجتمعوا بالسيد المحافظ اللي هم طلاب المعهد الزراعى بعد ما يظهر هزقوا العميد وحصل يظهر برضه مناقشات ضخمة؛ إزاي البوليس وإزاي الحاجات دي؟! وبعدين الحقيقة مكانش عندى معلومات و حضرت باقى الاجتماع، طبعا الولاد يعنى هم بيستغربوا إزاي فى الآخر؟! دي نمرة واحد.

نمرة اتنين: وصلهم معلومات إن القاهرة فيها مظاهرات وفيها مسائل، وأنا قلت لهم: أنا جاى من القاهرة ومفيش حاجة ومحصلش فى إسكندرية أكثر من لقاء فى مدرج إزاي نحكم على الحوادث؟! وقعد الاجتماع حوالى ٣,٣٠ ساعات وأخذ وعطاء فى موضوعات خاصة بالبوليس برضه والداخلية وقوانين التعليم.

سرى للغاية

أنا قلت لهم: القوانين نوقشت على كل المستويات وقعدوا شوية توصيات، طبعا إحنا حولنا المحكمة ٤٠٠ طالب وكان بينهم برضه طالب وقت ما حضرت أنا من المعهد الدينى. وحسيت بعد ماسمعت كلامه نفس الكلام خاص بقوانين التعليم وتطبيقها عليهم والمواد وثقل المواد، وبيطالبوا بأن السيد وزير الداخلية يدى بيان تفصيلى مش مجرد بيان مختصر، عايزين يعرفوا الأحداث على حقيقتها. وأنا قلت لهم: أنا جاى من القاهرة ومحصلش حاجة فى القاهرة، ولكن الصورة اللى عندهم بأن القاهرة فيها إضرابات، وأنا استغربت يعنى قلت لهم: والله إذا كنتم بتحكموا على شئ محدش منكم شافه مجرد إشاعات، يعنى العملية فى منتهى الصعوبة.

يعنى أنا حسيت إن هم زعلانين دلوقتى ابتدى التأثير إن عملية القفل هتأثر؛ لأن سمعت من بعض الطلبة خصوصا فى الزراعة بيمتحنوا ترمين والترم قرب يخلص أو فاضل له شهر أو شهر ونص، ومجرد التعطيل طبعا والخوف من استمرار التعطيل هيضع عليهم الفترة وبالتالي هيفوت عليه فرص الامتحانات. قلنا له: طب إكتبوا اللى إنتو عاوزينه، كتبوا توصيات وخرجوا على أساس إن المناقشات اللى دارت بينا وبينهم، وإن هم بيطالبوا بمزيد من اللقاءات السياسية علشان يفهموا إيه هى الأوضاع ومايفاجأوش بمثل هذه القرارات، وإن منظر البوليس بيؤرقهم ولازم البوليس يتشال فورا من المعاهد الموجودة فى المنطقة. إنما يعنى على الـ ٣,٣٠ ساعات كان برضه دردشة وياهم ومحاولة الإقناع يعنى خرجوا، وانتهت العملية على أساس إنه يعوزوا شوية تفسير أو شرح للأحداث بتاعة المنصورة.

يعنى يظهر إن الصورة بتتنقل مشوشة والأربعة القتلة بقوا أربعين مش أربعة! وإن البوليس كان قاسى جدا فى العملية. وطبعا بقول حاجة تانية: المسؤولين فى المحافظة معندهم أى بيانات غير ما نشر فى الصحف؛ سواء الاتحاد الاشتراكى أو المحافظ فى التعليق على أى بيانات من اللى أثيرت فى الاجتماع.. دى نقطة حبيبت أوضحها.

عبد الناصر: إقرأ لنا طب الورقة دى.

حجازى: ضرورة صدور بيان رسمى من وزير الداخلية يوضح فيه جليا الموقف الصحيح الذى تم فى المنصورة مبينا فيه الأحداث التى تمت، يجب محاكمة المسؤولين عن قتلة الشباب فى المنصورة، ضرورة معاملة رجال الشرطة للطلبة بأسلوب يتناسب مع كرامتهم. إيقاف قرار وزير التربية والتعليم - مكانوش فاهمين إن القرار نوقش - وأنا قلت لهم: إن طلبة الاتحاد إشتراكوا فى مناقشة هذا القرار، وإن هذا القرار نوقش على أعلى المستويات السياسية.

سرى للغاية

ورفع الحصار الذى فرض على الجامعات والمعاهد العليا من رجال الشرطة؛ لأنهم آملين إن الدراسة هتعود بسرعة وطالبين رفع الحصار.

وبعدين نمرة ٦: تأييد الأحداث اللى حصلت فى المنصورة وإسكندرية. تحولت بعد مناقشات اللى حصلت فيما بينهم تأييد المؤتمر لاعتراض الطلبة على القوانين التى صدرت بشأن تطوير قوانين التعليم العام؛ على أساس إن يبقى لنا الحق إننا نعترض.

وبعدين المطالبة باستئناف الدراسة فوراً.

غانم: إسمح لى سيادتكم أتكلم فى نقطتين.. النقطة الأولى: خاصة بإغلاق الجامعة، والنقطة الثانية: انعكاس إغلاق الجامعة على قطاعات أخرى من الجامعة.

بالنسبة الى إغلاق الجامعة: دا قرار حكيم جدا لا يشينا فى شئ؛ لأن بعض الدول كان فيها اضطرابات فى الجامعات النهارده فيه جامعات فى أمريكا الشمالية والجنوبية والأقاليم فى فرنسا مغلقة وباكستان، وإغلاق الجامعات فى دولة من الدول مايبدلش أبدا على ضعف الحكم أو الأجهزة السياسية الموجودة فى الدولة. أما فيما يتعلق بإغلاق الجامعة، الواقع إن الاضطرابات كانت مفاجئة لأن احنا كنا ماشيين فى جو كان واضح أوى إنه جو هدوء نفسى وإن الطلبة مقبلة على الدراسة ومفيش أى تفكير ومستريحين للقيادة ومستريحين للحكم.

هو الملحوظة اللى كانت موجودة قريت عنها فى الخارج ولقيتها منعكسة فى الداخل، إن دايمًا الاضطرابات الطلابية فى المرحلة الحالية مايتبدش فى العاصمة بتبدأ فى محافظة أو إقليم ويحصل انعكاسها بعد كدا فى العاصمة. ودا اللى حصل عندنا إن الاضطراب بدأ فى المنصورة، وبعدين حصل له انعكاس فى إسكندرية وبعدين كان من الضرورى يحصل له انعكاس فى القاهرة.

النقطة اللى عاوز أؤكد عليها، إن بعض الجامعات فوجئت بقرار الإغلاق، ودى الحقيقة يمكن جامعة القاهرة الى حد ما وجامعة عين شمس الى حد كبير؛ لأن إمبراح كانت الدراسة منتظمة وكان الأساتذة عندهم دراية بما حدث فى المنصورة. كان فى عين شمس الحادثة بتاع المدرس بتاع الآداب اللى هو كان قبض عليه فى إحدى القضايا. وحصل استفسار عن الوضع لأن بدأ إمبراح شوية تجمهر فبدأوا يسألوا فى كلية الآداب عن اللى حصل، فبدأ فعلا فيه أمور مقنعة إن دى قضية وطلبة آداب راحوا شافوا القضية وكان الموقف هادى جدا. كان فيه أحد الأساتذة فى الكليات النظرية زميل الأستاذ المعتقل كان مهتم بأمره أوى، وكان بيحاول إنه يجمع الناس عشان تحاول تضغط علشان الإفراج عنه،

سرى للغاية

ويعدين فهم إنه مقبوض عليه فى قضية وكان بيعتقد إنه اعتقل فى داخل الكلية، ولما عرف
يعنى اقتنع بأن العملية سليمة.

وبالتالى إغلاق الجامعات مسألة حكيمة، ولكن يمكن قد تكون هناك ضرورة
لفتح الكليات تدريجيا لأن الناس مقبلين على العمل ومعهدهم أى رغبة فى الإخلال
بالنظام، بنسيبهم مغلقين فترة طويلة ليه؟! فأنا بأثير مسألة الفتح الجزئى للتعليم العالى مش
فورا بعد مرحلة.

النقطة الثانية: الانعكاس الخاص بإغلاق الجامعة، أنا حسيت إن فيه قلق خارج
الجامعة بالنسبة لحوادث الجامعة، والناس بتتساءل: إيه اللى حصل فى المنصورة؟! وإيه اللى
حصل فى إسكندرية؟! وإيه حكاية الأستاذ بتاع عين شمس دا؟! وحاسس إن فيه قلق
ومتصور إن احنا نقدر نقول: إن احنا خارج الجامعة نبذل مجهود كبير لإزالة القلق؛ لأن
إغلاق الجامعات دا شئ عادى جدا موجود فى كل الدنيا، إنما لما القلق يمتد من الجامعة
الى أجهزة أخرى بتبقى العملية أصعب.
شكرا.

كامل: لو أذنت لى ببعض التعقيبات بسيطة لا تتناول الأحداث فى ذاتها لأن الأحداث مجلاه
ومتكاملة مع بعضها، وإنما تعليقا على هذا وهذا التعليق يشمل خمس نقط موجزة.. عن
إحنا بنلاحظ إن فيه سبب مباشر بيؤدى الى عملية التحريك، هذا السبب لو جينا فى هذه
الحالة أحيانا بيبقى سبب ويؤدى الى نتيجة ويؤدى الى فيما بعدها فبتبقى عندنا ٣ حالات..
حاجات موجودة الشئ المتعلق اللى هم خدوه لو استخدمنا الاصطلاح الإسلامى كقميص
عثمان؛ اللى هو مسألة قوانين التعليم بدأت فيها ثم جت بعد هذا أحداث اتخذت سريعة
لأشياء بعدها وإشاعات وجدت مجال كبير لتنتشر فأدت الى تصاعد المسألة.. دا فيما
يتعلق بالأسباب المباشرة التى يمكن إنها تتخذ لهذه العملية.
ولكن من الملاحظ أن هذه الأسباب لا تؤثر على الجمهورية كلها بدرجة واحدة،
ولكن الملاحظ عندنا نقط ساخنة موجودة فى الجمهورية ونقط هادئة. لو جيت على سبيل
المثال أيام الموضوع بتاع الفدائيين ومواقفهم مع الملك حسين، نجد إنه حصل شئ من
التحرك فى الدقهلية، وأمكن جدا القضاء على هذه العملية هناك والتفاهم مع الجامعة لأن
الطلبة اللى هناك قالوا: إن الملك حسين واخذ موقف معين من الفدائيين، وتفاصيل هذا
الموضوع عند إخواننا المسؤولين عن الأخبار.

سرى للغاية

إذاً نجد عندنا نقط معينة يمكن أن تكون ساخنة.. القاهرة نقطة ساخنة إسكندرية نقطة ساخنة، بينما نجد تجمعات إما عمالية أو طلابية ومع هذا فيها هدوء كبير جدا. ويجب أن نميز بين النقط الساخنة الهادئة الموجودة عندنا فى مصر، وبعدين هذه النقطة الساخنة سيكون بينها خطوط اتصال؛ يعنى ممكن جدا تبدأ العملية من نقطة ثم تنتقل الى نقط أخرى. ففى هذه الحالة بالذات لاحظنا إنها بدأت من المنصورة ثم انتقلت الى الإسكندرية، وبعد كذا جت القاهرة وفى الواقع موقفها يكاد يكون موقف تابع لموقف إسكندرية وإسكندرية موقفها تابع لموقف المنصورة.. ودا برضه يرجح وجهة النظر اللى تفضل بإبدائها الدكتور حافظ.

فعلى ذلك لو جينا إحنا على أساس تحديد النقط الساخنة وخطوط الانتقال، هيطلع عندنا إحنا علاج هياخد ناحيتين.. يالما هياخد الوضع التنظيمى يالما الوضع السياسى. وأقصد بالتنظيمى التنظيم الخارجى، الفرق الوحيد بين المعالجة السياسية والمعالجة الإدارية، إن المعالجة الإدارية إنما هى تنظيم ظاهر والمعالجة السياسية إنما هى تنظيم مستكن فى نفس الأفراد. فأحنا مضطرين أن نحاول إن احنا ناخذ علاج ظاهر علشان نهدئ، وبعد ذلك لابد أن يكون هناك تربية سياسية منتظمة حتى تستطيع هى أن تؤمن الوضع الظاهرى؛ فالنتين مافيهمش واحدة تكون بديل للأخرى بأى حال من الأحوال.

وإذا مافضلت سيادتك فى هذه الفترة محافظة على الوضع الشامل إن احنا كلنا نلجأ لإقرار النظام فلن يكون هذا الإقرار إلا إقرار ظاهرى يشمل المجتمع، وإنما العلاج الحقيقى ينبغى أن يكون عن طريق الحل السياسى؛ والحل السياسى بطبيعته يجب أن يتناول خريطة الجمهورية على أساس النقط الحساسة أو الساخنة، ويعطيها علاجاً أكثر من النقط الأخرى.

ده بس تعقيب.

متشكر.

عبد الناصر: الحل السياسى ده ياخذ قد إيه تفنكر؟

كامل: كما نعلم جميعاً يافندم هو طويل الأمد، ولكن لا يمكن أبداً إن هو يكون محل تأخير؛ زى ماسيادتك بالضبط اتكلمت عن الأنفاق باعتبارها سياسة طويلة الأمد للمواصلات، ممكن نتكلم عن التكوين ونبدأ فيه من الآن، فى نفس الوقت اللى يحفظ فيه النظام.

سرى للغاية

عاشور: لو سمحت سيادتك من ضمن الآراء الى فتح الكليات على بعض المراحل، أنا بعبر عن رأى الشخصى والتجربة فى إسكندرية بالذات؛ أنا ضد هذا الرأى. وإن يجب أن يكون هناك موقف حازم فى الفترة اللي بنمر بيها، ومن حسن حظنا إن شهر رمضان اللي احنا فيه دلوقتى يعتبر نصف يوم عمل تقدر ناخذ وقت أطول، وبعدين ميبقاش فيه اجازة نص السنة مثلا باعتبار إن فترة الطلبة ضاعت منهم.

أما عن إسكندرية - وخصوصا كلية الهندسة - أعتقد أنه ثار قديم؛ لأن الطلبة فى إسكندرية فاتهم الرد والمرة اللي فاتت واستطاعوا إنهم ماخرجوش فى المظاهرات، فحبوا المرة دى يبقى معاهم المبادأة المظهرية أمام الكليات الأخرى. لو فتحنا الكلية وسيبنا كلية بعنقد إن إسكندرية ميطلبش عليها هذا الكلام؛ فأعتقد لابد من الحزم. سيادتك رددت اسم عاطف الشاطر، الطالب ده ضبط فى آخر السنة اللي فاتت يغش فى الامتحانات وعملوا له مجلس وحوكم فعلا! برجو من السيد وزير التعليم العالى إن نشوف هل التحقيق وهل الطالب دا هل فعلا أخذ جزاء؟ لأنه على خلق سيئ جدا وهو سبب المسارات فى كلية الهندسة؛ فيبقى معانا ورقة إن احنا ممكن نحسم هذا الموقف مع الشاطر بالذات دا، ومخدش الجزاء الرادع بتاعه بحيث يبقى مثل قدام الطلبة.

صالح: لو سمحت لى يافندم أنا شايف إن المشكلة هى مش فى الطلبة، يمكن مشكاة مباشرة أو وقت حاضر، وأؤيد إن الموقف يبقى حازم معاهم ولا بد إنهم يشعروا إن هم يخسروا نتيجة الامتحان اللي بعد 6 شهور وتفوتهم الفرصة. وزى ماقلت سيادتك، إحنا مش محتاجينهم فى خلال هذا العام حتى لو ماشتغلوش! فلا بد بأن يكون فيه نوع من التأديب. قطعاً دى هتتعرض آثارها على أهاليهم، هم اللي هيزعلوا ولكن إذا عرفوا إن الأولاد مخطئين، واجب الحكومة أساسا فى الجبهة الداخلية مع أهالى الناس دول، إزاي إحنا الأسلوب الحكومى يمشى فى معالجة مشاكل الجماهير فى نفس الوقت.

فيبقى التدعيم العسكرى هو الأساس وهو الصوت السائد فى هذه الفترة، أعتقد إن المسار اللي مشينا به فى المواصلات فى الإسكان فى التصنيع علشان العمالة وتشغيل الناس، الناس إذا حسست بهذا هو دا الرد على الطلبة لأن ده نوع من الإخلال بالنظام.

سرى للغاية

البرلسى: اسمح لى أرد على الأخ حمدى، محدش هيفكر يفتح كلية فى جامعة معينة، الكلام يمكن فيه بعض المعاهد متناثرة معهد تجارى فى الزقازيق مثلا لوحده عدد قليل وكتبوا إنهم مش عايزين الكلام دا، لكن مش كلية كذا فى جامعة لأ.. محدش هيفكر التفكير ده وسيادتك تعلم يافندم إحنا أوقفنا برامج التدريب العسكرى مع قفل الجامعة بديهى يعنى. شكرا.

عاشور: لابد أن يكون هناك حزم، ولا بد من التركيز على ٣ نواحي.. أن ماحدث ليس من المصلحة ولا يفيد الدولة فى شئ؛ مثلا المعهد الدينى ليس له علاقة بقوانين التعليم. على أى حال إن قوانين التعليم بذاتها ليست مقيدة للأمور على الطلبة، ولكنها أكثر تأثيرا من القوانين القائمة.

عبد الناصر: متهيألى اللى انتقال النهارده أكثر من اللازم.

صوت: الحقيقة اللى حصل ده ملوش سبب!

عبد الناصر: هو ده الموضوع، هو ده الحقيقة الدور اللى فات فى فبراير أنا قلت: فيه سبب أحكام الطيران؛ الدور ده بادور على سبب مش لاقى الحقيقة! وأنا قلت لكم هنا فى مجلس الوزراء من الصيف فى الجرايد بره وفى إنجلترا وفى أمريكا وبيروت بيقولوا: الطلبة هيعملوا الطلبة هيعملوا! وأنا قلت هذا الكلام وإن احنا أجلنا فتح الجامعة وحصل هذا الموضوع. الحقيقة النهارده فيه عملية لازم نوضع لها نهاية، هل الطلبة هياخدوا دور بهذا الشكل بإنهم كل يوم يحطوا البلد على المحك ويعملوا tension فى البلد؟! ومعنى كمان هل نترك الطلبة يتظاهروا تحت اسم الحريات؟! يبقى معنى هذا إن احنا بنقول لديان فعلا: تتفضل بقى للبلد! هل هنترك الجبهة الداخلية تحت رحمة ولاد غير مسؤولين مش متربيين؟! والحقيقة العدد اللى يتسبب فى هذا عدد قليل، وأنا باعتبار إن الولاد بتوع المنصورة من مجموعة الدكتور النويهى، ولأن أنا بعرف إن الدكتور النويهى بتاع دسوق له مجموعة وهو شيوعى معاه مجموعة من الطلبة فى جامعة إسكندرية وبيتصل بطلبة فى المنصورة!

سرى للغاية

الحقيقة المنصورة وضعها غريب، كلنا بنعرف وضع المنصورة بالذات فيها قواعد رجعية وفيها شيوعيين وفيها أيضا إخوان مسلمين، والشيخ بتاع المعهد اللي هناك ده بيقولوا من عيلة الإترى وكانت عليه حراسة واتشالت.. كلام بهذا الشكل يعنى.

فيه ناس النهارده ممكن يتصيدوا أى حاجة، والطلبة الدور اللي فات بيقول لك: ثورة فبراير وانتفاضة فبراير و.. و.. و.. الى آخر هذا الكلام، وبيقولوا إن طلبة ٦٨ ليسوا أقل شجاعة من طلبة ٤٦! طلبة ٤٦ طلعا ضد الإنجليز وضربوهم فى ميدان التحرير والإنجليز كانوا فى قشلاق قصر النيل.

يعنى فيه نوع من العنجهية ومن الاستهانة، وبعدين بيروح العميد بيهزقوه بيروح المدير بيهزقوه! وصل الأمر الى هذا الشكل، وبعدين اللي بيقود هذه العملية عدد معروف بالاسم فى كل كلية.

ودلوقتى هل نفتح الكليات لتعود، مثلا يحصل نطلع قانون.. مثلا مطالب طلبة إسكندرية إمبارح إقالة شعراوى جمعة والتحقيق معاه، وبعدين محاكمة البوليس وإصدار قانون الحريات كلام غريب أوى! وإنهاء دولة الشعارات. وبعدين الهتافات اللي طلعت والشعارات أنا طلبتها وهى مترتبة بسجع! وبعدين فيه عدد من الطلبة العرب مشتركين فى هذه المواضيع أيضا!

فالسؤال هو.. هل نفتح الكليات ونستمر بقى فى هذا الوضع كل يوم؟! وبعدين الحقيقة عملية المؤتمرات اللي حصلت بعد العودة الى الجامعات بعد ١٦ مارس كان فيها قلة أدب كتير أوى وسفالة، وأنا عارفهم بالاسم واحد واحد اللي اتكلموا واللى كتبوا واللى علقوا المنشورات فى كل الكليات. وأنا قلت: بنسيب ما بنعمل حاجة وبنشتغل بالعمل السياسى. الحقيقة بالنسبة للعمل السياسى، مش ممكن والدور اللي فات أنا فاكر قلت لك لما إنت قلت نبقى نتصل بمين؟ وأنا قلت: تبقى نتصل بشعراوى. وأنا قلت برضه بتتعمل مؤتمرات ويحصل كلام.. كلام فارغ وحاسين إن محدش هايقدر يعمل لهم حاجة أبدا بأى حال من الأحوال.

فى الحقيقة بهذا الشكل لا يمكن أن تعود الجامعة الى الدراسة إطلاقا، وإلا بهذا تبقى حطانا باستمرار فى مشكلة كبيرة جدا وكل يوم تعمل لنا أزمة! فالحقيقة ليس أمامنا إلا بنشوف الحل اللي يمكن الجامعة من إنها تبقى جامعة، وبعدين الضرب هنا إيه؟!!

سرى للغاية

أنا شوفت فى التلفزيون، أنا شوفت فى فرنسا عربيات الجيب حاطين فيها مربع عليه أسلاك شائكة، وداخلين وبيضربوا الطلبة ضرب! وفى إنجلترا المظاهرة اللي حصلت من قيمة أسبوعين ضربوهم وخذوهم تانى يوم ودوهم المحكمة وحكم عليهم.

جمعة: فى المكسيك.

عبد الناصر: بلاش المكسيك.. خليها فرنسا. وبعدين هنا بيتعلموا مجاناً، وحتى إحنا كنا قلنا اللي يسقط لازم يدفع مصاريف، قلنا السنة اللي فاتت يتعمل قانون وهذا القانون لم يعمل لأن عدد كبير من الولاد اللي كانوا متزعمين سقطوا السنة، واللى فى الاتحاد واللى عملوا كذا وكذا سقطوا كلهم حتى مش هيقدرنا يدخلوا الاتحاد السنة دى.

الموضوع إن العملية عايزة حسم، وبعدين الجامعة إحنا مش عايزينها والحقيقة إحنا مكتفين.. بيوفروا لنا ١٠ مليون جنيه! ولازم يعرفوا إن الدولة فيها حكومة وإنهم هم مواطنين فى هذا الوطن ولازم يخضعوا للنظام!

النهارده لما نمسك ألمانيا.. ألمانيا اللي انهزمت فى الحرب العالمية الثانية حصل فيها ما حصل بقت النهارده المانيا سيدة العالم المارك الألمانى اللي عمله النظام وكده.

هل هنرجع لعهد الفوضى بتاع زمان ونحط كردون حوالين الجامعة والعملية دى؟! قد يستدعى الأمر الى هذا إن احنا نحط كردون حوالين الجامعة ونرفد إن شاء الله نرفد نص الجامعة! إذا كانت الجامعات مابتقدرش تاخذ المسؤولية أنا باخد هذه المسؤولية يعنى!

والحقيقة الطلبة دول كلهم إحنا مش عايزينهم، إذا كنا ناخذ نصهم ويبقى فيه إنتظام والباقى يتفصل ياخذهم فوزى أحسن يعنى بياخذهم يجندهم ويطلعوا على معسكرات تدريب.. كتايب عمل. ولكن لازم البلد دى النهارده، اليهود النهارده.. الوضع النهارده بالنسبة لينا مهوش وضع سليم الوضع صعب جدا. أنا فى كلامى الأسبوع الماضى مع أحد الأمريكيين اللي هو كان هنا - اللي هو بولك - وهو مطلع على السياسة بيقول لى: اليهود لازم يعملوا حاجة ضدكم لازم، وعارفين إن السبب فى الوضع الحالى إنتم وإنهم خدوا هذا النصر ومش قادرين يوصلوا الى أى تحقيق سياسى، وعارفين إن إنتم بتجهزوا لحرب ومش هيعطوكم الوقت، وقال لى: إنت بالذات!

سرى للغاية

وقلت له: طب هيعملوا إيه؟ قال لى: هيجوا القاهرة. قلت له: صعب. قال لى: بينزلوا لك البيت! هذا الكلام بهذا اللفظ.. هيجوا لك فى البيت! لأن الوضع عندهم بقى وضع desperate، وعملية الفدائيين هم يعلمون ماذا حدث فى الجزائر وأنجولا وموزمبيق والفلبين.. الى آخره. ويعنى شايقين الطريق رايح فين، والبلد الوحيدة اللي واقفة ضدهم إنتم! الأمريكان بيطلبوا إن القضية تبقى مصرية - اسرائيلية، معنى هذا إننا إذا وافقنا على عملية بهذا الأردن وسوريا مفيش فايدة ولا العراق حتى!

فالحقيقة الوضع حساس جدا، وفعلا إحنا معرضين فى أى وقت الى إن اسرائيل تحاول تصفى العملية معنا تانى! فإذا بانك البلد كل شهر والتانى إنها مهزوزة بهذا الشكل! يعنى أنا فى رأى إن البلد مش مهزوزة محتلين إحنا، طب ماهم الروس احتلوا فى وقت ستالين ووصلوا الألمان لغاية موسكو وفرنسا كلها احتلت.. محصلش يعنى.

وبعدين حكاية دولة الشعارات والكلام ده الحقيقة بقت موضة يعنى! أما بنمسك بيان ٣٠ مارس وإيه إتعمل فيه، إحنا قلنا الجلسة اللي فاتت إيه إتعمل وإيه إتعمل. ولكن هو مين اللي بيتكلم؟! أنا عندي مثلا ابني فى كلية الهندسة هو مرضيش يدخل منظمة الشباب، وقال لى: هى منظمة غير مقبولة فى الأول، وبعدين هو صحابه كثير فى الكلية فيه ولاد كويسين كثير جدا وفيه ولاد بيحضروا الاجتماع كويسين، لكن اللي مخوفين الدنيا ومعتبرين العملية هى الجرأة والشجاعة، غير كده يبقى عميل للسلطة وعمال للمباحث وعمال للمخابرات! مجموعة قليلة موجودة فى الكلية.. فده الحقيقة الموضوع.

وبعدين فيه مواضيع غريبة برضه جرى الأساتذة ورا الطلبة! عرفت إن الدكتور درويش راح للطلبة وقال لهم: إنه هيسهل لهم الامتحانات ومش فاهم إيه! وإنهم بيعتوا برفقيات لوزير التعليم عشان مايعينوش عميد جديد! بتحصل حاجات بهذا الشكل بتخلى الطلبة تطمع فى العميد!

الحقيقة العميد ده ليه قيمة كبيرة جدا، يعنى أنا كنت طالب فى كلية الحقوق العميد مكناش بنشوفه وتبقى عملية كبيرة جدا، وكنا بنطلع مظاهرات وكلام بهذا الشكل ولكن بدون مانهزق حد بدون مانتكلم ولا نقل أدبنا! كنا بنطلع الحقيقة لسبب وطنى قومى محدد.

سرى للغاية

حجازى: لى اقتراح يافندم، هو جرب فى الجامعة قبل كده بعد أحداث ٥٤ وأخذ بعض الطلبة اللى كانوا شاردين فى اتحادات الطلبة والكليات، وأظن مش جمدوا هم أخذوا فى عملية تدريب عسكرى فى ذلك الوقت. وأنا أذكر بعض منهم كانوا شاردين شرود غير عادى هم أظن قعدوا ٤٠ يوم فى ذلك الوقت، وكان عددهم محدود فى جامعة القاهرة بالذات. ولكن بعد عملية التدريب هى مكانتش اعتقال هى كانت تدريب تابع للقوات المسلحة، الحقيقة لما رجعوا شفنا صورة مختلفة لأن يمكن بعدهم عن الجامعة ومعايشتهم للجو العسكرى مع عملية التلقين أفادت جدا فى ذلك الوقت. معرفش إذا كان نجمع مثل هذه المجموعات الموجودة فى الجامعة وبنعزلهم فترة معينة؛ معرفش هل هذا الاقتراح يفيد أم لا؟ لأن زى سيادتك ماتفضلت الجامعة بخير ولكن هذه القلة الصغيرة بتجر المصائب الكبيرة، فما ذنب الكثرة من الطلبة فى الجامعة الكويسة والمؤمنة ببلدها بهذه الفئة العاصية؟!

كامل: لو أذنت لى يافندم، ساعة ما أعلنت قوانين التعليم، اتصلت بزيملى الدكتور حلمى مراد على أساس إن الكلام مع طلبة المعاهد عندنا يكون فى الاجتماعات عن طريق المفتشين؛ بأن هذه القوانين لا تنطبق عليهم، وإن من عندنا منطلعش شئ على الصحف عشان ماتباناش المسألة على كإنها نوع من المزايدة فتؤخذ هذه القرينة ضد القوانين بتاعة التعليم العام. ودا اللى سرنا عليه فى الـ ٤٨ ساعة الأخرانية دول، وكنت بفكر على أساس إنها نوع من الكوردون الصحى العقلى للطلبة فعلميا هذه القوانين مش هتنطبق عليهم، فهل هناك ما يمنع من الاعلان بأن معاهد الأزهر باقية على نظامها السابق دون أى تأثر بنظام التعليم العام، وإن إعادة النظر فى برامجها تكون نابعة من واقعها التاريخى وهدفها وحيث تكون البرامج فى طاقة الطلاب وإعدادهم لوظيفتهم الاجتماعية؟

على أساس إن أنا اللى بتصوره إن جاييز جدا إنهم شافوا إن الجامعة كدا فجاييز جدا أن تبدأ التحركات على مستوى ثانوى بعد ذلك.

عبد الناصر: طب ممكن تعلن ذلك داخل المعاهد نفسها.

كامل: أعلنها يافندم، لكن فى هذه الحالة ماعلنوش فى الجرايد التوجيهات اللى قاموا بيها المشايخ والمفتشين، وهم موجودين فى مواقع المعاهد من أول إسكندرية.

سرى للغاية

عبد الناصر: البيان اللى طلع من وزير الداخلية قال: إن هذه المعاهد لا تنطبق عليها القوانين.

كامل: هل هناك ما يمنع إنها تبقى نشرة داخلية.

عبد الناصر: إحنا بنقول فى المعاهد بنقول هذا الكلام.

كامل: لو تفضلت يافندم أقوله ولا يوزع عليهم مكتوبا؟

عبد الناصر: يوزع مكتوب وتمضى عليه وتختم كمان! (ضحك)

أصوات: (ضحك)

مراد: هو بس يافندم إنها مش هاتطبق هى فى الأصل لا تسرى عليهم، لكن الشكل اللى أثاره السيد وزير الداخلية إن اللايحة التنفيذية لقانون الأزهر لم تصدر حتى الآن، فبيجوا بيطلبوا من وزارة التربية والتعليم تعمل لهم امتحانات المواد الحديثة، فوزارة التربية والتعليم تقول لهم: بدل ما أعمل لكم أسئلة تعالوا خشوا على الأسئلة اللى عندى وامتحنوا فيها، إنما مفيش شئ أبدا يلزمهم قانونا إنهم بالنظام بتاعنا ولا بأسئلتنا؛ ده المفروض العكس إن لهم أسئلة خاصة وتصحيح خاص وامتحان خاص وسيصدر لايحة لهم بهذا. كون اللائحة ماصدرتش وهم بيرموا الحمل على التربية والتعليم، والتربية والتعليم الناحية الفعلية بنقول لهم: اتفضلوا امتحنوا عندنا.. دا وضع آخر إنما قانونا ماتسريش.

كامل: يافندم لو تكلمت أنا مش هخش فى المناقشة الموضوعية بتاعة هذا الموضوع، ولكن الواقع التاريخى بتاعه بياخد ٧ سنوات من الدراسة فى الأزهر، مش هاخش فيه فى الجلسة وكل اللى بقوله هو الحقيقة البسيطة وهى إن هذه القوانين لا تسرى على طلاب الأزهر، وإن تطوير المناهج هناك إنما ينبع من واقعهم.. دا بس كل اللى عايز أقف عنده النهارده.

البرلسى: تسمح لى بس تعقيب بسيط، تمشيا مع سياسة الحزم اللى تحدث عنها عايزين نوضح إن قانون التعليم العام مش محتاج أبدا إن احنا نبرر اللى اتخذ فيه ولا ندافع عنه؛ لأن الحقيقة كل الخطوات الخمسة أو الستة الكبار اللى فيه خطوات إصلاحية جيدة جدا وكلنا كنا عايزينها سواء كان فى التعليم العام أو التعليم الجامعى. فبدى برضه مانقش تحت

سرى للغاية

ضغط بأى سبب من الأسباب ونحاول نقول: لأ.. ده عليه وده مش عليه؛ أنا بدى يتضح للناس كلها إن ده إصلاح مش قانون وإصلاح مطلوب علشان نبقى جد - زى سيادتكم مابتقول دلوقتى - وكلنا عاوزينه، وده حقيقى إن ده ينطبق على الطلبة فى سنة أولى وتدرجيا ده، إنما مانقش فى خطأ تفسيرات متتالية توحى بإن إحنا استعجلنا ونشرنا.. لأ!

عبد الناصر: الحقيقة هذا القانون دونا عن جميع القوانين إحنا بحثناه فى مجلس الوزراء مرتين، جميع القوانين لا تبحث فى مجلس الوزراء الحقيقة، ثم أنا فى مرة قلت روح إبحثه فى اللجنة المركزية. أنا مش عاوز الدكتور مراد يحاول يبرر الضرر من العملية! هذا القانون إحنا شفناه جميعا وإحنا كلنا وافقنا عليه وشفناه مرتين وعملنا له لجننتين. راح اللجنة المركزية عن دون القوانين كلها، بحث هنا مادة مادة بالإضافة الى البحث اللى إنتو عملتوه قبل كده؛ فهو الحقيقة مش يفكر الدكتور مراد إن هو اتسبب فى العملية دى فيفضل كل يوم يدى تصريحات! (ضحك)

مراد: يافندم أنا شاكر تشجيع سيادتكم وتأييدك، إنما هو الواقع زى سيادتكم ماقلت إن احنا جميعا وأنا مؤمن إن ده إصلاح كبير فى البلد، إنما إذا كانت مجموعة كبيرة من طلبة فاشلين كبار فى السن فى مدرسة خاصة فى المنصورة قامت بهذه العملية إنما كام مليون طالب!

عبد الناصر: يوم ما شفت الدكتور حلمى علشان الوزارة، أنا قلت له: الطلبة بيطلعوا من ابتدائى مابيعرفوش يقرأ ويكتبوا وإن أنا جايب لولادى كل واحد ٣ - ٤ مدرسين؛ طب مين بيقدر يجيب لولاده ٣ - ٤ مدرسين؟! عملية مستحيلة! إذا مكانش الواحد يتعلم من الابتدائى ويطلع متين فى كل العلوم مش ممكن؛ فالعملية هى عملية إصلاحية. بتطلع مدرسة خاصة.. أنا قلت له فى التليفون: إقلها الخاصة دى خدها!

الحقيقة هناك سلطة الدولة.. يجب أن نمارس سلطة الدولة بكاملها بالنسبة لكل هذه الأمور. طالما معدناش التنظيم السياسى القادر النهارده بالنسبة لقطاع الطلاب إنه يمسك الطلاب، إذا يبقى لازم سلطة الدولة تمارس بالكامل ولا يسمح بحال من الأحوال.. مع التوضيح - زى ماقال الأخ - نوضح كل هذه الأمور. ولكن اللى أنا متصوره مفيش سبب للعملية كلها، وإن الأسباب واهية وإن العملية كلها هى عملية تليك وفيه ناس عواطلية! الجامعة لا يمكن الحقيقة إنها تستمر بهذا الشكل.. ده الموضوع.

سرى للغاية

رياض: يعنى لا شك إن تماسك الجبهة الداخلية أساسى النهارده، وأى اضطراب بسيط بيحصل عندنا بالرغم لو بصينا فى خريطة العالم الاضطرابات دى فى آسيا وأمريكا اللاتينية وفى كل حته. أمريكا مفيش حاجة اسمها حرم جامعى بيخش البوليس فى الجامعة وبيضرب! ولما جت سيرة المكسيك شفت الجيش هناك داخل كأن الجيش الألمانى داخل يغزو مثلاً بولندا!

بصرف النظر عن ده كله، لكن النهارده بالذات فى اسرائيل لا شك تنتعش نفوسهم لما يسمعو إن فيه اضطراب فى مصر، وإن إذا استدعى الأمر للحزم إغلاق الجامعة الحقيقة نهائياً لابد؛ لأن المعركة هى مسألة حياة أو موت بالنسبة للبلد، والبلد اللى ملاحظ فيه - بصراحة - فيه ميوعة يعنى ميوعة انتقلت من الجامعة ومن الطلبة الى كثير من الجهات فى البلد! يعنى مش العميد بس - سيادتك أشرت اليه - يحترم.. الواحد كان بيخاف من الناظر الابتدائى! النهارده الواحد يسمع من أولاده إزاي الطلبة الثانيين يتكلموا عن المدرسين والنظار!

فى البلد كلها فيه تساؤلات والناس مش فاهمة متصورين دلوقتى العملية تدمر على نطاق واسع، وإلا هيقال فيه تدمر على قطاع واسع فى البلد ولذلك من خلال النظر فى عملية الحزم التفكير فى خطة لعلاج الموضوع وإزاي نظهر هذا الحزم، هل يكون قفل الجامعة فقط لمدة معينة؟ ما هى هترسى بإنها هتنتفتح تانى، فهو بس إغلاق الجامعة وكيفية شرح الموضوع للناس مش هو شرح التعليم ده اتشرح كفاية، إنما اللى لفت نظرى فيه ناس راحوا للقناصل إذا فيه تحرك أجنبى.. إذا فيه اتهام بالعمالة.

يعنى البلد هتغلى وتغضب لما يسمعو إن فيه طلبة راحوا لقنصل إنجليزى فى إسكندرية! هيقول لك الله ده إحنا رجعنا لعهد توفيق!

فغرضى فيه حوادث معينة، اللى هى إظهار اليد الأجنبية الموجودة حتى إن الشعب يغضب ويحس إن فيه يد مسؤولة أجنبية بتلعب فى العملية دى. من ناحية الرأى العام اللى موجود فى الداخل، يحصل إن بعض الناس دول إبراز مساوئهم حتى نقدر نفضلهم عن المجتمع وما يطلعوش أبطال زى بتوع فبراير.. رجعوا أبطال! وبرضه هم فاكرين كده! فعلمية عزلهم عن المجتمع باعتبارها أساسية للتأثير على الوضع بتاعنا فى الداخل، اللى يجب أن نوضح لهم هذه المسائل.. التخريب اللى حاصل.

سرى للغاية

فيه نقطة ثانية: إن ٩٩٪ من طلبة الجامعات كويسين وعايزين يكملوا تعليمهم والباقي يعملوا شوشرة، وبيان إن الدنيا كلها صخب! هل هنترك الـ ١٪ يظهر الـ ٩٩٪ بهذا المظهر السيء؟! وبعد مدة معينة لما يحسوا إن فيه حزم تتفتح الجامعات تدريجيا مثل أسبوط بعد أسبوعين أو ثلاثة، لو واحد فتح بقه واتحرك يبقى لأبد ياخذ على دماغه؛ فهتبقى عملية مزدوجة فالواحد خايف إن ينتقل السخط للناس اللي مهتمين بتعليمهم!

عكاشة: لو سمحت يافندم، المعاهد الخاصة في وزارة الثقافة الطلبة فيها بتتقسم ٣ أقسام.. الثانوى الابتدائى فى معاهد الموسيقى والباليه وخريجى الجامعة قسم الإخراج فى السينما أو قسم النقد والديكور فى الفنون المسرحية وطلبة فى البكالوريا؛ الثانوية العامة الوضع مختلف. عندى فى الوزارة اجتمعوا النهارده وعايزين يكملوا التعليم، فهل نحاول نمشى معاهم فى التجربة دى وبدون ما أعرض السلطة لأى شئ؟ ويجوز التجربة فعلا دى تتم وتكون مثل أمام الكليات الأخرى.

عبد الناصر: كام؟

عكاشة: حوالى ٦٠٠.

عبد الناصر: ابتدائى وثنائى؟

عكاشة: ابتدائى وثنائى.

عبد الناصر: هو الابتدائى والثانوى لا يسرى عليه.

عكاشة: لا يسرى عليه؟

عبد الناصر: طبعا. بالنسبة للباقيين أنا الحقيقة مافضلش إنك تروح.

عكاشة: بلاش أروح يافندم، أوجه أشكر سيادتك.

سرى للغاية

البرلسى: بس يافندم تعقيب بسيط علشان الأخ رياض الأمر اللى أثاره مضبوط، وأنا قلت: إن فورا يجب إن الفئة اللى تزعمت الحركة واللى تزعمت العصيان لازم يتحقق معاهم فورا، ويحاولوا للتأديب فورا. وقلت لحضرتك: إن قانون الجامعة يسمح من أول التوبيخ حتى فصل نهائى من الجامعات كلها؛ فده هيتم فورا قبل فتح الجامعات بس بعد ماتخلص وتروق الدنيا.

عبد الناصر: هو الموضوع أكبر من كده يادكتور، يعنى إيه هو لو نقول: إن الأولاد المسؤولين عن عملية إمبارح. لأ.. مش هم دول بس اللى فى الجامعة، ده فيه فى كل كلية عدد من الناس ومعروفين بالكامل وبالاسم وكل حاجة ومعروفة اتصالاتهم.. الحقيقة ده موضوع لازم يبحث.

وبرضه بفكر نعمل لجنة يبقى فيها الدكتور لبيب ووزير الداخلية والدكتور البرلسى، يشوفوا الموضوع بالكامل والتشخيص موجود والعملية موجودة والكارت بتاع كل واحد من الطلبة موجود.

لكن إذا جينا النهارده آخذنا بتوع هندسة إسكندرية بس وجينا فتحنا الجامعة، أنا عارف هندسة القاهرة يعملوا مؤتمر وهيقولوا أدبهم، وهيقولوا: رجعوا اللى إنتو فصلتوهم، وبالتالي هيطلع العلوم الى آخر هذه العملية.

العملية هى لازم يبقى فيه إصلاح كامل فى الجامعه زى ماتعمل سنة ٥٤. إحنا فى ٥٤ شلنا الطلبة وشلنا الأساتذة - ٢٥ أستاذ اللى هم الشراوى المجموعة اللى كانت موجودة فى هذا الوقت ومحمود أمين العالم مجموعة كبيرة اتشالت - وبعدين اتعمل الامتحان على فترتين وترمين ومن أول السنة كل واحد بيذاكر.

برضه فيه فرق بين سنة ٥٤ و ٦٨، الكلام اللى بيتقال: الدنيا فيها ميوعة! طبعا نتيجة الحرب.. الى آخره دى كلها عوامل موجودة! ولكن رغم هذه العوامل خير لنا إننا نقفل الجامعة خالص بدل مايبقى كل يوم عندنا مشاكل. وبعدين هم إمبارح فى إسكندرية حاولوا يتصلوا بالعمال أيضا وراحوا والعمال شتموهم. طبعا بعد كده العمال قالوا: إن لهم مطالب بالنسبة لقانون الدمغة بالليل.

فالعملية بهذا الشكل تبقى باستمرار الجامعة قنبلة موقوتة قدامنا! وعابيلين همها! نفس السؤال: هل نسمح بعملية فبراير اللى فاتت تتكرر، وعملية المؤتمرات فى داخل الجامعات اللى حصلت فى مارس وإبريل، وعملية جرايد الحائط اللى بتحصل وكلها كلام فى منتهى السفالة والقذارة إنه يمشى؟! أنا بقول: إن ترك الموضوع بهذا الشكل هو اللى شجع الأولاد على إنهم يعملوا اللى عملوه!

سرى للغاية

هل هنترك الناس تطلع تتظاهر فى الشارع؟! ده موضوع يعنى أنا بالذات حتى قلت لشعراوى.. قلت له: بيطلعوا بالرصاص واللى بيطلع فى الشارع.. العملية هنا هى سلامة الدولة. الأول بتندروهم وبعدين بتضربوا؛ لأن الحقيقة لما هنسب عملية المظاهرات فى الشوارع ويطلعوا يكسروا! إحنا فى المنصورة كسروا المحلات وضربوا البيوت وعملوا عملية بهذا الشكل.. فهذا الموضوع غير مقبول كلية.

الحقيقة الحكم لازم يكون حكم ياهم يحكموا ياالدولة تحكم! الناحية السياسية هذه نفكر فيها أيضا إزاي ننفذها سواء بالنسبة للتنظيم أو المواضيع الأخرى، ولكن الجامعة تفضل مقفولة لغاية مايحصل فيها تطهير كامل.

حجازى: لو سمحت لى سيادتك كلمة بسيطة عن قانون الدمغة.

عبد الناصر: معلىش يبقى نتكلم فيه بعدين.

بدوى: كنت عايز أقول فيما يختص بالفترة اللي الجامعة مغلقة فيها، هيئات التدريس يجب أن يعلموا الصورة تمام والإجراءات التي تتخذ بعد ذلك؛ علشان هم الأساتذة اللي هيقابلوا الطلبة بعد ذلك لما تتفتح الجامعة، مش هيبقى أمام الطلبة إلا الأساتذة والأساتذة يجب إنهم يعرفوا الصورة اللي هتسير عليها الجامعة فى المستقبل.

عبد الناصر: الحقيقة النهارده فى فترة الضيق والنفرزة بنقول: بنعمل إيه ونسوى إيه، ولهذا بقول: يقعدوا ثلاثة لبيب والبرلسى وشعراوى بيحثوا الموضوع بكل جوانبه وينشوفه، عملنا هذا بالنسبة للناحية الادارية وبعدين الكلام مع الجامعة يبقى نمشى العملية.

أبو نصير: النائب العام والنيابة العامة كان لهم اقتراح فى هذا الشأن تقدموا به لنا، وهم عايزين إضافة جرائم التجمهر وجرائم المظاهرات وتكون من الجرائم اللي يجوز نظرها أمام محاكم أمن الدولة. أنا بعث الموضوع لسيادتك، يافندم إحنا فى حالات طوارئ وده قرار بيصدر من رئيس الجمهورية بتحديد حالة الطوارئ التي يجوز نظرها أمام محاكم أمن الدولة.

سرى للغاية

أحمد: فى الواقع كشيخ عاش فى الجامعة طوال حياته، أعتقد إن آن الأوان أن تتخذ إجراءات حازمة مع الطلاب. الحقيقة الدولة إبتهم كثير جدا لكن مفيش استجابة أو مفيش وفاء من بعضهم. وما أتخذ من قرار إغلاق الجامعة أعتبر إنه قرار سليم، ويجب أن يستمر مدة طويلة عشان هم يشعروا إن اللى عملوه لا يهم الدولة من قريب أو من بعيد.

قفل الجامعة زى ماقال بعض إخوانا، إن القلة النادرة هم سبب هذه الاضطرابات أما الباقي عايزين يتعلموا، خاصة إن فيه بعض الكليات زى كلية الزراعة اللى ماشية على نظام الفصول الدراسية وعندها امتحان بعد شهر ونصف؛ دول كانوا جادين ومنتبهين فى دروسهم والطلاب مجدين.

أنا شخصيا كنت إمبراح بأدرس كانت الدراسة منتظمة فى جامعة القاهرة الى آخر النهار، وطلاب مجدين ولا فيش أى ظاهرة الطلاب، لكن الطلاب الأقلية لازم يؤخذوا بحزم شديد، بقتح زى الطلاب دول لو هنوقع عليهم عقوبة. لو كان هناك أيدي خفية تتصل بيهم؛ لازم هؤلاء أيضا يؤخذ معاهم فى نفس الوقت إجراء حاسم عشان نبقي خدنا المشكلة ككل.

لازم إجراء حاسم معاهم ونعالج المشكلة كحل واحد.

كامل: سؤال يافندم على أساس الكليات يبقى موجود عليها كردونات، هل الأساتذة عليهم التواجد فى المدينة بحيث يمكن تجميعهم أو يمتنعوا عن الذهاب عشان نكون واضحين وكل الكليات تمشى مع بعض.

عبد الناصر: إيه رأيك؟

البرلسى: لا يافندم الأساتذة مالهمش اجازة، معاهم معيدين بيدرسوا دراسات عليا واللى معاه ماجستير ومعاه دكتوراه ده هيمشى لأنه عدد قليل.

كامل: لأن يافندم لها علاقة بالكردون نفسه.

عبد الناصر: لا.. هو الكردون مش هيقعد على طول، هو النهارده على أساس إن القرار جه متأخر وهيصبح الصبح الطلبة هيروحوا على الكليات.

سرى للغاية

البرلىسى: بعد كده حرس الجامعة كافى.

مراد: لو أذنت سيادتك، إذا كان الأخ الأستاذ فايق عقب الجلسة فى بيانه يدى بعض معانى من اللى قالها السيد وزير الخارجية، زائد معانى أخرى مثلا: إن المجلس أثناء مناقشته أبدى أسفه إن فريق من الطلبة لم يقدر الخطورة اللى بتمر بها البلاد الآن وعرضها الى مسائل قد تؤدى الى خطر، وإن سبيل الديمقراطية مفتوح إن أى واحد يتقدم بالأساليب المشروعة، إنما التجاء البعض لأساليب منحرفة تعرض الدولة للخطر.. ده لا يمكن يسمح به فى هذه المرحلة. وإن الشرطة إذا كان واجبها فى كل أن إنها تحافظ على النظام وتمنع السلب والنهب، فمن باب أولى فى زمن الحرب إن قواتنا ظهرها ببقى محمى وماتكونش معرضة لقتل فى الداخل، لا يمكن إن الشرطة إلا أن تؤدى واجبها القومى فى حماية القوات المسلحة؛ لأن احنا عايزين برضه إن الشرطة ماتبقاش مكروهة من الناس.

عبد الناصر: هذا الكلام ماينفعش يتقال كده لأن أى كلمة من الكلام ده لازم تتوزن الحقيقة، وبعدين إبتدت تطبع من دلوقتى مش كده ولا إيه؟

فائق: ده ممكن يافندم.

عبد الناصر: بس نقول استمع الى تقرير مفصل من وزير الداخلية ووزير الأوقاف والتعليم العالى والتربية والتعليم ووزير العدل بالنسبة للعملية دى، لو فيه كلام بنجهزه بكره.

مراد: ومعنى يافندم برضه والحالة الحاضرة تحتاج الى الجدية والأمانة والإخلاص فى العمل.

صوت: مااحنا عارفين.

أصوات: (ضحك)

مراد: للأسف إحنا خايفين - لأن زى سيادتك ما أشرت دلوقتى - كل واحد يطلع له قانون أو نظام أو إصلاح فى أى قطاع من القطاعات؛ يعنى نيجى نعمل قانون عاملين إصلاح ييجى بعض الموظفين الكسالى يقولوا: لأ! ودائما أصوات الفاشلين والكسالى هم الأعلى صوتا.

سرى للغاية

عبد الناصر: إحنا بقى لازم نرفد ولازم نمنع الذهاب الى محكمة القضاء الادارى! (ضحك) كل ما بندى ضمانات هيطلع لك.. أنا أول إمبراح قارئ فى الهند رافدين عدد كبير من الموظفين لأنهم اشتركوا فى المظاهرات. بالنسبة للهند إحنا الحقيقة عملنا أكثر من الموجود فى لبنان! (ضحك) يعنى قانون الطوارئ بتاعنا مفيش نسبة بينه وبين قانون الطوارئ فى لبنان والمحاكم العسكرية فى لبنان، والحكم العسكرية مش فى وقت طوارئ فى الوقت العادى، وعندهم المجلس العدى والمحاكم العسكرية إحنا الحقيقة وصلنا.. ورغم كده بيقلوا: أين قانون الحريات؟! الحريات هى إيه؟! إنه نطلع فى الشارع؟! هو ده العملية.

فيه ناس بيتكلموا مع الطلبة، الحقيقة أكثر القوى المعادية شايقة إن المجال الخصب هو الطلبة؛ لأن فيه فراغ فى الطلبة والناس بيحجروا ورا الولاد المتزعمين.. دا بيحجروا وراه ودا بيحجروا وراه.. الى آخر العمليات!

تقعدوا مع لبيب وتشوفوا الحل اللى ناخدها بالنسبة للنواحي الادارية. بالنسبة للنواحي السياسية لازم نعمل خطة للعمل السياسى فى الطلبة، طبعاً هتاخذ وقت طويل لكن العملية اللى احنا متأكدين منها إن خروج الطلبة بهذا الشكل ده موضوع لازم ينتهى بأى شكل من الأشكال وإلا يبقى الوضع باستمرار وضع..

رياض: إزاي نبرز ده للناس إزاي يفهموا إن فيه حزم وإن الميوعة مش مقبولة النهارده؟!

مراد: لازم ناخذ الأمور بجد وحزم.

رياض: وإن اتجاه الأحداث دى لا يوجد إطلاقاً اتجاه لمثل هذه الأمور. يمكن سيادتكم بكرة تفكر بشكل آخر.

عبد الناصر: نفكر فى الموضوع إزاي يتعمل، لكن أنا مش من رأيى إن الليلة يطلع فايق لأن الكلام ركيك مفكك والكلام اللى مش جاهز بيحجب تأثير عكسى.

رفعت: زى ماتفضلت سيادتكم إن موضوع الطلبة أداة فى العملية قطعاً، وتقديرى إن فيه عناصر وراء العملية سواء عناصر داخلية أو عناصر من الخارج، وتقديرى هى دى النقطة اللى يجب التركيز عليها بالذات زى ما الأخ رياض اتكلم فى هذا. ما فى شك إن عناصر أجنبية بتلعب فى العملية، معرفش إذا كانت وزارة الداخلية عندها علم بمثل هذا ولا لأ؟

سرى للغاية

ولكن من الضروري توضيح هذه العملية للجماهير كلها وخصوصا فى هذه الظروف بالذات، ولا يمنع أن نركز إنهم قاموا وكسروا المحلات، والشرطة بناء على هذا تصدت الشرطة ماتصدتت لأن تمنع مظاهرة.

عبد الناصر: أنا فاهم إن الأهرام مطلع بكره موضوع بهذا الشكل عن عملية المنصورة. اللى أنا فاهمه إنه هيدى المنصورة صورة كاملة، وممكن بعد بكره الأهرام يدوا صورة كاملة عن عملية إسكندرية.

رفعت: يقال إن فيه شخص يهتف ويقول: تقدم ياديان! تذكر برضه..

أصوات: [معارضة لذلك]

عبد الناصر: هو اللى قال لى هذا الموضوع أول واحد هو الدكتور حلمى، الحقيقة أنا طلبت أنور السادات كان فى المنصورة وكان بايت هناك، وقلت له: هل حصل هذا الكلام؟! قال لى: إن فعلا. ولما قال لى الدكتور حلمى هذا الكلام اتضايقت جدا! هو قال لى الأول: هذا الكلام يعتبر خيانة، قلت له: إيه هو اللى يعتبر خيانة؟! قال لى: إن الطلبة هتقوا أقبل.. أقبل ياديان! فأنا طلبت المنصورة وسألت أنور السادات فقال لى إنه سمع هذا الكلام وسمعه من المحافظ، فالحقيقة حبيت أعرف عن طريق الأهرام برضه طلبت هيكل قلت له: إسأل مراسل الأهرام فى المنصورة، هل إتقال هذا الكلام أو ماتقالش؟ هو كان كلامه إن فيه شك فى هذا الكلام ومفيش حاجة بهذا الموضوع. تملى المسار الرسمى واحد اللى هيدى المحافظ هو اللى هيدى أنور السادات هو اللى هيدى حلمى مراد واحد بس هو اللى هيدى الكل! الواحد يدور على سكة تانية غير اللى إدوا كل المصادر؛ ولهذا أنا الحقيقة كلمت الأهرام وكلمت هيكل وقلت له: شوف، وكان رأيه فى هذا الموضوع إن فعلا فيه ناس..

كامل: لو أذنت لى يافندم، كون أعمى لا يمسه المبصرون!

أصوات: (ضحك)

سرى للغاية

عبد الناصر: إنتم عندكم الأعمى يقود المبصرين! (ضحك)

أصوات: (ضحك)

كامل: لكن كون واحد أعمى كان قائد المظاهرة ومعرفش حد يمسكه! فطبعا الإشاعات يعنى حتى مقدروش يمسكوا واحد أعمى! (ضحك)

عبد الناصر: هو أنا أشك الحقيقة مهما بلغ من الناس الكراهية مش ممكن! حكاية تقدم يارومل دى الإنجليز قصاد الألمان، أما حكاية واحد حتى فى المعهد الدينى ولا حتى كان إخوان مسلمين مش معقول هيقول دى؛ لأنه هيجى ينسف بيته زى ما بيعمل فى الضفة الغربية!

صوت: بعض الأولاد وجدوا فى جيبهم فلوس، يعنى فيه ولد أبوه مبيض ولا حاجة زى كده لقوا فى جيبه ١٠ جنيه!

عبد الناصر: هم قالوا لى أول إمبراح: إنه اتوزع فلوس فى المنصورة، كان كلام من بعض الناس اللى راحوا يشوفوا العملية سياسيا، لكن أنا الحقيقة برضه ما برضاش آخذ العمليات دى على طول ككلام أكيد، الواحد الحقيقة برضه هل الدنيا اتغيرت؟! بس مانوصلش إن فيه حد أيامينا ياخذ فلوس! بالعكس اللى بيطلع يتظاهر بيطلع علشان ينضرب ويتحبس.

البرلسى: أيامينا برضه كان فيه فئة تاخذ من الوفد.

عبد الناصر: لأ.. كانوا بياخدوا خدمات من الأحزاب لما تيجى، لكن محدش ياخذ فلوس علشان يطلع يعمل حاجة بهذا الشكل، لكن الطالب ده من المعهد الدينى.

عاشور: من المعهد الدينى أيوه يافندم. يافندم لو سمحت من الأهمية بمكان لماذا بدأ هذا فى المنصورة بالذات.. إשמعنى المنصورة هى المنطقة اللى بدأت هذا الشرار؟!!

سرى للغاية

عبد الناصر: أنا رأيت الحقيقة إن المنصورة باستمرار هي منطقة مشاكل.. باستمرار فيها مشاكل، وبعدين هي فيها إقطاع وشيوعيين وفيه أيضا إخوان مسلمين. وإحنا أفرجنا أنا قلت في المؤتمر: كان فيه ٨٠٠ معتقلين من الإخوان المسلمين أفرجنا عن ٣٠٠. وبعدين ما بنعتقلش.. الحقيقة طوال السنة اللي فاتت ما اعتقلناش، لكن اللي كان بيحصل الأول في أي عملية بنعتقل؛ يعني معروف كل واحد بناخذ ضده إجراء لذلك كانت الناس عارفة إن اللي بي عمل الشئ الفلاني بيتاخذ ضده إجراء. دلوقتي إحنا الحقيقة قلنا: بنعمل بالعمل السياسي فالحقيقة العمل السياسي ماشى بالنسبة للعمال وناجح جدا بالنسبة للفئات الأخرى والمحافظات الأخرى، لكن الحقيقة الدقهلية من المحافظات اللي هي مش سهلة! وبعدين هذا المعهد الديني باستمرار سمعته سيئة يعني باستمرار مركز مشاكل، ولكن تعالى أنا روحنا المنصورة السنة اللي فاتت وإنتم جيتم المنصورة.. روحنا المنصورة وكان المحافظ قافلين عاملين كردون حوالين البلد علشان محدش يبجي من بره، وروحنا شفنا البلد في الاستقبال وضع لا يمكن إنسان يتصوره، علشان بيان ٣٠ مارس. شفتم البلد إزاي؟! هل البلد دي اللي بتعمل بتعمل العمليات دي!؟

أصوات: لأ.

حجازي: المدرسة الخاصة دي يعني أنا النهارده وأنا باشرح للولاد بابص لقيت الولاد قالوا اسم المدرسة.

مراد: الفلال.

حجازي: وأنا شخصيا مش متذكر الاسم، أنا بقول لهم: ده الطلبة الفاشلين اللي بقالهم ٣ - ٤ سنين في الثانوية العامة، الولاد اللي قاعدين كام واحد قالوا: اسم المدرسة كأنها معروفة.

مراد: والطالب المعتقل اسمه زكي الفلال.. قريبة يعني.

جمعة: هو سيء.

سرى للغاية

عبد الناصر: هو الحقيقة أيضا لازم مديرين الجامعات يكون لهم قيمة، مدير جامعة إسكندرية يقال عنه إنه ضعيف فى الكلام أو فيه علاقة سيئة بينه وبين الأساتذة، معرفش العلاقة السيئة بينه وبين الأساتذة ومفيش استجابة.. ده كلام أنا سامعه. هو طبعا كان وزير معانا فى وقت من الأوقات، كان وزير إصلاح أراضى هو راجل طيب قوى.. برضه ده موضوع يتحط فى الحساب. إذا كنا هنمشى العملية بهذا الشكل، يبقى عايزين مديرين حازمين وعمداء حازمين علشان يقدروا يمسكوا ويتحملوا المسؤولية الحقيقة. ولكن إذا كان كل واحد هيهرب من المسؤولية ماتتفعلش العملية! علشان ميقاش فيه ميوعة يبقى كل واحد يتحمل مسؤوليته. معرفش هل نحن متفقين إن العملية ماتحتاجش ميوعة؟

أصوات: تمام يافندم.

عبد الناصر: وهى دى الحقيقة الثغرة الوحيدة. ثم إن احنا الناحية السياسية بنشوف بنفكر إزاي هنعملها. بالنسبة النهارده مثلا طلبة الاتحادات بيقلوا: الطلبة المعتقلين ده مقبوض عليهم، وممكن يروحوا تجمهر أو كده يفرج عنهم. الحقيقة الدور اللى فات أنا روحت حلوان وقلت: هانفرج عن الطلبة وأفرجنا عنهم ومش فاهم إيه. هل النهارده هانفرج؟ أنا متصور.. شعراوى قال لى، قلت له: لأ.. وإلا! هو يعنى لازم أولا نعمل خطة كاملة للموضوع كله وبعدين نشوف. الحقيقة يوم المنصورة أنا قلت لهم: سيبوا الولاد بتوع المنصورة، قالوا: إحنا عايزين نقدم حد للمحكمة.

أبو نصير: كان ٤.

عبد الناصر: قلت لهم حتى بلاش الأربعة للمحكمة على أساس آهو موضوع وحصل فيه ٤ قتلى، مفيش داعى للمحكمة. لكن الحقيقة دلوقتى أدام دول اللى حرقوا الأكشاك وهاجموا مديرية الأمن، يبقى الحقيقة الموضوع موضوع آخر يعنى. ثم بعد تطور العملية والقبض على ناس فى إسكندرية والقبض على ناس فى القاهرة، يبقى إحنا مش ممكن نسيب الأولاد دول! العملية الثانية بالليل، الطلبة والمحافظ كان هناك، قالوا له: إن بيطلع خبر فى الجرايد يتقال فيه إن الرئيس أمر بتشكيل لجنة للتحقيق فى أحداث الإسكندرية، وإحنا هانفض الاعتصام! طبعا هذا كلام غير مقبول الحقيقة، وبعدين بتوع الهندسة هنا برضه بيقلوا: يطلع خبر فى الجرايد!

سرى للغاية

جمعة: حاجة غريبة فيه حوار ومناقشة!

عبد الناصر: مش فاهم! عمليات الحقيقة لا يمكن إن احنا نقبلها بأى شكل من الأشكال! ده كل شئ بالنسبة للموضوع. وبعدين برضه أنا بقول: إن احنا لن نفتح الجامعة إلا إذا طهرناها..
طلبة وأى أساتذة منحرفين؛ يعنى لازم ناخذ مسؤوليتنا بالنسبة لهذا العمل.
أى حاجة أخرى بالنسبة لهذا الموضوع؟

حجازى: فيه تعليق بسيط لو سمحت، برضه الجهاز السياسى إذا كانت اللجنة المركزية هتجتمع..

عبد الناصر: يوم الأربعاء.

حجازى: برضه الموضوع، أنا لقيتيه النهارده جدول أعمال فى الشرقية للمناقشة فاستغربت الحقيقة! وبالتالي قفلناه كده بسرعة، وبالتالي أرى إن الموضوع يوضح ولو بمناقشة بسيطة.

عبد الناصر: هو طبعا إحنا هانروح نتكلم هناك، الحقيقة دلوقتى الكلام اللى حصل النهارده وروحنا اتكلما فى اللجنة المركزية، إن وزير التربية يقول: ده المعهد الدينى، وبعدين وزير الأوقاف يقول: لأ.. دى المدارس؛ يبقى شكلنا وحش جدا! (ضحك)

الحقيقة الكلام الفيصل فى هذا الموضوع هو الكلام اللى قاله نصير اللى هو بعد التحقيق، هو أنا قلت له أنا اتصلت بأبو نصير قبل الفطار قلت له تاخذ النائب العام وتطلع على المنصورة وقلت له: أنا عايز أعرف الحقيقة إيه اللى حصل بالضبط، هو بعثلى تقرير عن الموضوع.

فممكن يعنى فى اجتماع يوم الأربعاء الإخوان اللى اتكلما النهارده يتكلموا؛ لأن لازم هنتكلم فى الموضوع لأن الـ handling السياسى فى العملية لازم هيكون مطلوب، بالنسبة أيضا للجان الاتحاد الاشتراكى وبالنسبة لكل البلد لازم يعرفوا إيه الحقيقة، وبيتهيألى لازم يطلع بيه كلام من الليلة.

سرى للغاية

كامل: استفسار يافندم، سيادتك تفضلت وكلفت الدكتور لبيب شقير والأستاذ شعراوى جمعة والبرلسى
بحث موضوع التعليم العالى، فهل الأزهر موجود فى هذه اللجنة يافندم؟

عبد الناصر: آه.. ما فيش مانع طبعا.

كامل: شكرا.

عبد الناصر: يبقى متهيألى الـ mood ميمشيش بقى مع الإسكان! (ضحك) ولكن يعنى بالنسبة لفايق
يقول برضه: إن احنا بحثنا موضوع الإسكان وهنستأنف البحث فيه فى الجلسة الجاية.
شكرا.